



寒水齋先生集

十四

墓表

卷十四

~ 16  
2420  
14





和  
2420  
15-14



寒水齋先生文集卷之三十一



墓表

尤菴先生墓表

孔子生於周末時諸侯放恣亂臣賊子無所懼作春秋以嚴萬世臣子之防朱子生於宋末時戎狄亂華二帝北狩力主斥和之論以明不共戴天之義先生之生又當大明之季目見天地翻覆四海腥塵協贊聖謨以傾否濟屯為己任蓋天迫於氣數不得不一治一亂而其亂也必生聖賢使大綱大法不墜於地嗚呼天之憂患後世可謂至深切矣夫豈偶然



而然哉先生諱時烈字英甫睡翁公諱甲祚之第三子也以萬曆丁未十一月十二日降降時睡翁公夢孔子至其家異之以聖賚爲小字嘗責勉曰朱子後孔子也栗谷後朱子也學朱子者當自栗谷始先生自兒時已受此教遂自任以聖賢之學及師沙溪先生盡得其所傳於栗谷者又專讀朱子書以成家計其用工也致知存養實踐擴充而敬則通貫始終故知行并進表裏如一至其道成德尊則精密純熟渾然粹然又嘗以爲天地之所以生萬物聖人之所以應萬事直而已孔孟以來相傳者唯是一直字以

此爲終身服行之符是以其動靜言爲正大光明如青天白日人得以見之此其爲學之大略也仁祖癸酉魁司馬拜敬陵參奉尋爲大君師傅則乃孝廟初潛也際遇之隆實昉於此丙子扈駕南漢媾成痛哭出城卽歸鄉里自分畢命於丘壑再爲持平而不起及孝廟卽位將伸大義於天下以掌令召又於誥命不書爲號先生感激入謝連拜進善執義時清陰慎獨同春諸先生與先生俱在朝人皆想望至治不意賊臣陰泄國情外喝日急乃相率而退除承旨贊善吏曹參議皆不就丁酉上赫然



奮發以密札招徠於是遂有許以驅馳之意戊戌以禮曹參判入朝 上特陞冢宰舉國而聽之當是時契合昭融經綸密勿世方以昭烈孔明擬之不幸天不悔禍 仙馭上賓事皆瓦解無當世之意 山陵甫訖遂返初服自是三十年間 兩朝之禮遇采重屢長兩銓三入黃閣而先生之志介如石也前後國家有事則雖黽勉入朝未嘗久淹至若 顯廟之戊申今 上之癸亥 上意欲修先王之舊政不無行可之望而流俗忌嫉小人沮敗不免袖手而歸豈非天也然 神德之復位 太祖之徽號 孝宗

之世室皆自先生發之天常賴以不晦可謂千古之大業此其出處之大略也先生受 孝廟世道之託以明天理正人心闡異端扶正學為己責嘗曰使此道由我而明於世雖滅死萬萬無恨也是以嘗於尹鑄之侮朱子改章句也極力攻斥曰此斯文之亂賊也如有助鑄而左右者則曰春秋之法亂臣賊子先治其黨與也以此鑄黨日夜睚眦逮甲寅之歲假禮論構禍遂至北謫南遷卒乃幽囚於海島則火色益急而先生道然不變有九死靡悔之志及庚申放還世道又大變門人尹拯以其父嘗以右鑄見斥於先



生蓄憾有素肆意修郤卒至鑄黨復起駭機交煽遂  
有己巳之慘禍嗚呼尚忍言哉先生受命在井邑  
縣是六月八日也臨終以治喪之節入道之要託付  
於門人從容靜暇無異常日是夜大星隕於東方白  
氣如虹橫絕縣居人異之甲戌上特命雪寃復爵  
賜祭賜諡及其遷窆也又命禮葬其所以崇終隱  
卒者備矣天道回還公議必伸亦可謂無憾而黨習  
已痼百怪層生斯文之厄至今未已此其遘禍之大  
略也先生嘗曰朱子之後義理大備靡有餘蘊後學  
只當尊信朱子極意講明為聖為賢不外於是必欲

著書垂後者妄也贅也是故其所用工者皆闡發程  
朱之旨雖在流移危困之中晝夜覃思不明不措使  
一言一句無不躍如雖初學之士亦能曉然知其歸  
趣矣若朱子大全劄疑二程書分類長髻時所述也  
語類小分巨濟時所編也問義通攷濟州時所成也  
心經釋疑則以退溪講錄承命而添刪者也又有  
文集百餘卷將行於世恩津之宋以高麗判院事大  
原為上祖入我朝雙清堂愉當太宗時退居懷德  
曾祖諱龜壽奉事贈判書號西阜有至孝居喪致  
白燕之異祖諱應期都事贈贊成睡翁公奉事



贈領議政大節卓然蒙 孝廟褒典妣郭氏 贈貞  
敬夫人其考忠臣自防也先生之配韓山李氏都事  
德泗女與先生合祔於水原舞鳳山向未之原所後  
子基泰都正二女適縣監權惟士人尹擣側出女爲  
閔周鏡妻孫男殷錫縣監疇錫校理茂錫郡守淳錫  
縣監晦錫早歿女適縣監崔星瑞外孫以鋌以錯以  
鎮府使權出也殷教周教尹出也會玄多不盡錄而  
適曾孫一源以學行爲 王子師傅先生以疇錫克  
紹家學常愛重之悉以後事囑付又教以墓前勿建  
大石只令尚夏記數行語於短表使後人識之蓋惡

其張大也噫欲書先生之事實雖百尺之碑曷足以  
盡之且其立朝大業昭在國乘居家至行爲世準則  
人皆誦法可傳於無窮故只撮其大略論撰如右嗚  
呼栗谷作於前先生繼於後以啓我海外道學之傳  
豈天之正氣東行自不得不然耶朱子之道至栗谷  
而復明栗谷之業至先生而益廣栗谷如天開日明  
先生如地負海涵世有知德者必信斯言之非誣也  
銘曰

義秉春秋學傳武夷集羣儒成爲百世師

仁齋成公 墓表



公諱熺字用晦昌寧人 國朝名臣寶文閣大提學  
文肅公諱石琰之孫京畿監司諱概之子判漢城府  
順天朴可實之外孫生於名祖之家學識高明以高  
行補漢城參軍 世宗庚午登文科入玉堂聲望傾  
朝逮 端宗朝國勢危疑與從父兄之子承旨三問  
協輔王室以死生不易其心相勉 景泰丙子三問  
等六人欲盡節於所事事泄皆死公亦連累受嚴鞫  
十次閉口不言 朝廷不殺安置金海使父子不相  
通籍沒收孥越三年蒙宥歸公州達田里屏藝窮陋  
若不自容竟以忠憤歿以遺命返葬于坡州長浦左

斗文里官止校理後以孫夢井貴 贈禮曹參判鳴  
呼君臣之分天之綱地之義人之彝公與六臣誓欲  
扶樹綱常死而不悔其心炳炳日月爭光其義烈烈  
撐柱宇宙是故 世祖大王嘗曰六臣等是當世之  
亂臣萬世之忠臣誠至教也公配星州李氏成安公  
堅基女葬與公同塋生六男六女曰聃壽參奉曰聃  
年弘文校理曰聃命生員有隱德曰聃齡進士號斗  
文山人曰聃仲以隱逸徵曰聃老忠順衛獨校理仕  
進其餘皆不起女長適獻納南禱次縣監李恂次奉  
事李釘堅次司諫李宐茂次生員壯元崔塘次監司



李復善側室子聃紀孫曾多不盡錄而文章德業前後輝映蔚爲東方大家天道之一虧一盈此可徵矣譜牒行世班班可攷此不詳焉當時之禍尚忍言哉畏約無窮人不敢開口一杯荒土宰如於坡山世不識誰氏子之玄廬 聖上表章六臣廟 頒賜恩額公之義烈與六臣一般子孫謀樹短石要余記之余亦公之外裔聞而感愴何敢以不文辭略敘數行俾刻于石乞文於余者公之後孫梓也

先祖參判府君墓表

嗚呼此廣州彥州里清潭之上庚坐之原故參判權

公之藏也公諱克和字庸夫 永樂辛卯魁生員甲午擢庭試乙科第二名歷敷清要官至刑曹參判後贈領議政花山府院君世遠家乘不詳生卒履歷無所考信其守樂安清剛果介吏良民愛者出永嘉遺蹟其以癸丑歲爲慶州府尹者出東都名宦錄其以己未歲爲全羅方伯明年遷禮曹參議者見本道先生案其以丁卯歲爲平安方伯者見於三和題詠而其爲忠清方伯者是子孫之所傳誦也文章鳴於世以三和及密陽安東務安陰城題詠觀之其詩瞻麗有韻致儘得古作者風真所謂一嚮可識全鼎也



我權貫安東上祖三韓壁上太師諱幸其後極昌大  
為東方甲乙族有諱賑都僉議諱興典工判書諱參  
右司諫知製教 贈左參贊修文殿大提學此公之  
三世也前夫人西原李氏某官完道之女有一男曰  
琦文科正郎後夫人楊州趙氏參贊啓生之女亦有一  
男曰瑊行右參贊花川君正郎三子郡守恩榮副  
承德榮慶榮花川三子監察曼衡縣監應衡縣監順  
衡公墓舊無碑碣八代孫尚游今又按節湖南樹此  
石而識之二夫人之葬與公同墓異塋俱未可詳故  
姑不敢顯刻於表面以俟日後焉左麓七十步許是

右司諫墓其上卽花川墓墓前俱有表 宗禎紀元  
後七十九年丙戌三月日八代孫尚夏敬書

贈左議政忠壯元公豪墓表

忠壯元公烈丈夫也壬辰之難孤軍力戰效節于金  
化 天子賜金褒嘉 本朝命贈大司馬又 命給  
夫人月俸又 命錄用子孫士林合議俎豆於金化  
原州兩邑後六十餘年我 孝宗大王追舉易名之  
典以樹風聲事在東國名臣錄公原州人諱豪字仲  
英高麗侍中弘弼九代孫也祖諱彭祖以武進秉鉞  
三鎮考諱松壽武科僉樞妣順興安氏其考生員珣



也公生於嘉靖癸巳少也通經史爲士友所推重  
忽自奮曰人顧樹立如何耳何必屈首筆硯間哉登  
丁卯武科由宣傳官兼備局郎歷官內外不能悉記  
而其所颺聲多在北門陞通政爲慶源府使時有尼  
胡之亂公領所部深入多所殺獲凌寒酣戰指爲之  
凍墮一軍皆服未幾有倭警極選將才以公爲全羅  
右水使倭寇左道住劄遠勢不及相救坐是流配尋  
放還歷數官解紱家食壬辰倭報急起公爲江原道  
助防將行收兵至平海則時全羅監司李洸畏賊不  
敢進且忌諸路勤王乃移檄曰賊已踰嶺國事已矣

於是諸鎮皆潰公軍亦散公遂還原驪間召募鄉兵  
殲賊于神勒寺捷上行在 上大嘉之特陞嘉善拜  
驪州牧使兼京畿江原防禦使賊大陣在原州連營  
隳突而其狂驪州龜尾浦者尤鴟張公夜襲擊大破  
之獲數百級他殺傷不可勝計仍住兵上游以遏賊  
衝江南北數百里不見賊鋒公之力也旣而江原監  
司柳永吉檄趣公擊北路賊公去而江上無復捍禦  
東路賊遂入京公引兵至金化猝遇大賊收兵山上  
終日相持士皆殊死戰所殺賊甚多然公兵亦盡矣  
只麾下李暉等六七人在側公氣益奮手射賊十數



人賊少卻已而復大進公矢盡力窮顧謂噉等曰吾受命討賊此吾死所也爾等可去矣遂投千仞之壑賊取公頭懸之縣門榜曰朝鮮軍民皆已歸順獨元某爲國抗我縣人識其處以標公屍夜取頭藏之公之孤至以告焉得以歸葬于原州西牛頭山卯坐之原從先壠也公事母孝奉先誠教子弟以義性廉白屢典雄邑歸橐蕭然京師無第宅僦屋而居之氣意激昂知有國而不知有身常以取媚權貴竊一時之榮者爲深恥雖坐此蹭蹬而人亦以此多之夫人金氏承訓郎光厚女歿後公廿三歲耐公墓左女適士

人奉良臣男裕男登武科策靖 社勲官知中樞原溪君推 恩贈公左議政原昌府院君原溪君二男斗杓亦策靖 社勲左議政原平府院君斗樞廣州府尹女適縣監尹堦原平三男萬石黃海監司萬里平安監司萬春右尹女適吏曹判書李敏敘府尹無子以萬里爲後三女適左議政朴世采參奉申銓縣監洪受濂嗚呼以公之精忠勇略得以自展其計畫則其勲業之成必益卓卓而顧乃以節制非人卒致輿尸之凶其亦遇時之不幸也歟雖然公之捐軀殉國實平生所素蓄積非如一時慷慨之比真所謂求



仁得仁而萬世彝常永有所賴則又何恨乎嗚呼烈哉

府使鄭公宗溟墓表

蓋當我宣廟之世松江相公以清名直節爲士林之幘幪公其第二子也諱宗溟字士朝早闡文魁蔚有公輔望不幸相公爲姦黨所仇嫉公亦困滯餘三十年仁祖改玉始乃颺登省閣進塗方闢而壽又不永識者嗟恨公生於嘉靖乙丑稍長簡重寬弘庚寅登上庠辛卯相公掇棘于江界壬辰蒙恩赴行在公未嘗離側竭誠扶持是年釋褐爲騎省郎癸

巳相公解體府在江都疾就公割指進血及喪大小事必稟於牛溪情禮無憾甲午以後相公之誣更起公痛哭冤憤如不欲生宣廟末年上訟辨疏不報及仁弘煽亂禍且不測會仁弘罷事遂已光海時復上疏痛辨而不之省癸亥仁弘等伏誅朝著清明公悉陳前後事上用大臣李公元翼申公欽議命復相公官爵公議大伸公遂由直講轉執義司諫兼編修官又歷司憲掌樂太僕正拜檢詳舍人校理輔德以通政江陵府使卒於天啓丙寅用從勲恩例贈兵曹判書初葬坡州後移鎮川智藏山相公墓下



夫人洪氏祔焉夫人參議仁傑之女生五子潏生員  
有志行洙縣監丁丑遇賊不屈死沈持平潏進善濡  
早歿女長適堤川縣監趙欽次適承旨崔有淵生員  
男慶演清安縣監壻府使李長英持平壻鄭始大進  
善男普衍壻參奉閔光益縣監尹憲卿堤川壻郡守  
朴世基承旨男涇灔壻進士李陽煥清安男澍潏沁  
主簿涉澔行副提學津縣監溫奉事泳普衍男游縣  
監蓋公姿稟魁偉行詒純備居家立朝可書者必多  
而經亂之後家乘不詳惜也尤菴宋先生嘗撰幽誌  
曰公之屈伸與世道相爲汙隆同春宋先生之誄公

亦曰棟樑之材此足以識公之平生是爲記鄭氏貫  
迎日爲東方大姓其世系載相公大碑此不著

觀察使俞公槐墓表

嗚呼此鳳洲俞公衣履之藏也尤菴宋文正先生旣  
銘其神道又大書表面以識之其門人安東權尚夏  
撮其事行之槩而書於其後曰公諱槐字典叔杞溪  
人仁祖朝有觀察使諱省曾以忠厚老成爲一世  
所推敬厥有二丈夫子并武清顯公其長也萬曆  
己亥四月廿八日生甲子司馬癸酉文科由槐院入  
翰苑歷薇垣栢府玉堂春坊兩銓郎知製教陞秩



為承旨參議觀察使卒於 崇禎乙未四月十八日  
以從勲 贈吏曹判書兩館大提學前夫人柳氏縣  
監健女一女適承旨李程所後子命夔官正郎後夫  
人宋氏直長時煜女一男命賚孫重基衡基林象台  
妻長房出也進士廣基應基度基慶基進士趙鼎彬  
妻次房出也承旨男喜澤府使女壻士人李震碩正  
字徐文翊縣監柳載和執義林世儉內外曾玄摠若  
干而承公祀者重基子彥璧也公內行甚備孝友之  
懿清約之操足為搢紳家觀法立朝審諤有古直臣  
風至其丙子所樹立溪得春秋之義使吾東土得不

失為禮義之邦其有補於世教民彝也大矣如使之  
大展厥施則其成就必不止此而年與位俱不滿德  
惜也尚夏述公幽誌公之本末亦略該矣而若我先  
生之銘尤有大焉足以垂示於無極茲不復詳噫百  
世之後知其為鳳洲之墓而尚有以起欽者其在斯  
歟其在斯歟

贈贊成金公光裕墓表

公諱光裕字子容晚翠堂諱偉之子也以 隆慶辛  
未四月十五日生自幼時聰明端重稍長儼然若成  
人事親敬長動止中節鄉黨有識無不嘖嘖既就學



早夜矻矻淹貫經史下筆成文滔滔不竭年廿一高中司馬兩場入太學士望蔚然慎獨金先生以公同年交誼最密常以畏友稱之壬辰之亂避兵湖嶺間數年不就公車乙未晚翠公卒於南原時公隨松潭宋公在通川甥館千里奔赴正值極寒涕淚成冰面龜髯效自痛遠遊未克終孝執喪踰禮遂致毀疾成痼兄弟族黨勸使就醫於京洛舁到懷川竟不起是丙申臘月廿四日也得年僅廿六臨終精神不爽了無怛化之意始葬公州沙寒里己亥遷窆于燕岐治東其洞曰釜其原負壬後以子貴屢 贈至左贊成

公風儀秀朗氣韻冲遠平生無疾言遽色天分甚高內行純備志操介潔澹於外慕親知之在銓地者嘗欲薦聞授官辭以年少竟不應聞者高之及喪人莫不嗟傷弔誅者如市慶州之金寔新羅國姓入我朝有曰相佐 太祖有大勲封鷄林府院君諡齊肅自是珪組蟬聯有諱璣縣監 贈判書判書生諱龜孫宣略將軍不仕宣略生諱士傑縣令 贈執義是晚翠公之考也晚翠參議 贈都承旨清名直節見推一世妣淑夫人光州金氏經歷熙緒女公初娶河東鄭氏別提億齡女早歿 贈貞敬夫人繼娶恩津



宋氏其考郡守柎壽松潭其號也夫人資性淑哲通書史曉禮法嘗哀集古女訓手書一冊常居誦讀松潭喜曰真女士也及歸于公夙夜不違則無何晝哭將引決下從松潭屢以遺腹慰解得不死後果生男名慶餘官副提學夫人嘗曰吾之隱忍至此上爲父母下爲兒子耳凡於父母奉養之節竭其誠意松潭有疾祈天願代嘗糞割指又燒指骨以進遂得神效後於慈氏之病亦斷指三年不梳頭饋奠必手備事聞朝廷嘉之特有給復之典夫人教副學嚴有法度及長以四子春秋詩書課誨副學旣通籍奉夫人

入京師丙子副學扈駕南漢夫人從之副學以督戰御史忠憤激烈夫人知其無生之心掘坎丈餘語婢子曰吾兒必不苟活渠死我亦死納我于此坎未幾媾成時事罔極副學奉夫人還鄉耕釣以養夫人安之夫人生于萬曆乙亥終于己亥四月十九日壽八十有五屢封至貞敬夫人與公同塋副學有一子二女男震粹通政縣監女適直長徐晉履監司洪得禹側出男震煥震炳奉公祀者曾孫昌錫今爲牧使其餘內外曾玄多不盡錄嗚呼公以名父之子生質又美聲華早颺其進未已而年未三十不勝喪而



歿此何理也夫人之至德純行求古罕倫而閨門事  
隱世無有知者尤可恨也雖然副學公身任大義為  
世名臣古人之稱榮公賢德者必本於申國有以也  
夫至今後承蕃昌蘭玉盈門金氏之福蓋未艾也天  
之所以報施者若合符契其可誣哉

外王考 贈判書李公墓表

九畹先生以文章清節為 宣 仁朝名臣有四丈  
夫子世以瑤環鸞鵠擬之公其第二也諱楚老字道  
卿早以詩鳴廿五取司馬數奇不第筮仕歷踐內外  
外則平陵召村沙斤察訪全義開寧殷山縣監榮川

郡守淮陽成川府使坡州尚州牧使內則禮賓主簿  
工刑郎水運判官 宗廟令司宰僉正廣興守漢城  
庶尹濟用軍資正其不赴者安山金堤高城潭陽及  
江華經歷也壬子陞通政拜敦寧府都正以今 上  
戊午八月五日考終于京第春秋七十六用子貴  
贈戶曹判書是年十一月三日葬富平酒論面三奇  
洞負震原公咸平人高麗大將軍彥之後曾祖諱允  
宇鎮川縣監 贈承旨祖諱場 贈贊成九畹諱春  
元巡察使妣海平尹氏其考 贈承旨諱鎮伯父漢  
城庶尹諱敬元聘真寶李氏縣監諱審女無嗣公以



九畹命承其後重宗事也夫人密陽卞氏典籤諱悌  
元女有婦德教子女以法亦多裨外治宗黨以女士  
稱其生壬寅其歿甲午其葬與公同穴其封 贈視  
公秩一男之翼文科禮曹判書七女適牧使李敏章  
執義權格引儀尹揆郡守郭昌徵檜原君倫通德郎  
閔周興縣監吳斗成側出男之箕之張萬戶之房女  
爲金俊獻睦昌慎妻判書所後男定相進士牧使男  
鼎命北評事次晉命泰命壻校理宋疇錫承旨申啓  
華持平金鎮圭執義男尚夏尚明尚游壻朴泰迪進  
士朴弼揆引儀男孝教進士次大教壻慎迪萬進士

高可寅朴泰齊趙光璧成義錫郡守男世績萬績并  
進士次弼績壻趙東輔安壽崗成必升通德男思誠  
進士縣監男胤周壻李世瑾李希稷鄭熙周庶房男  
女皆幼曾玄多不盡錄公氣宇軒爽風采溢發翛然  
有出塵之表平居常淨掃庭宇列以花竹焚香清坐  
嘯咏自適雖在 cities 蕭散如山林自少孺染大家風  
諛其門內之行旣皆足以爲法而至其居官則又詳  
密嚴恕至誠奉公所至民父母之無不樹石誦慕故  
在淮在尚俱蒙 褒典而最其清白一節古亦罕匹  
雖本於天性亦可見其所養也惜乎以公之德之才



空若大闡而位止於是豈非命也諸從以尚夏逮事  
最久俾識墓石以示諸後遂泣而書之如右

龜山處士成公夢箕墓表

往在丙子之獄六臣盡言不屈被極刑若校理成公  
燬以忠烈公堂叔父志同事同而終始塞兌受十次  
刑竄金海三年而卒雖死有先後其爲主盡忠一也  
其子聃仲終身自廢以守私義 朝廷特授南陽教  
官不起聃仲有子曰夢箕字子協性至孝旣孤以坡  
壠近京挈家寓林川之龜山下土牀蝸室不蔽風雨  
而處之晏如日與村翁野老評論桑麻而已遠近樞

衣者甚多搢紳大夫之往來江湖者莫不躬造其廬  
而致敬焉容齋李公最加愍惻勸以爲貧之仕公汪  
然出涕而不應李公義之改容歎息而去門人請堂  
號公掉頭曰稱龜山成生足矣後人因以爲號墓在  
郡西鉢山負辛之原嗚呼 國朝寬大禁網卽解時  
移之後進塗采闢而公之父子其心鐵石確乎不可  
拔此終古所罕聞者令人起敬公昌寧人 國初有  
領議政文靖公汝完大提學文肅公石琿兵曹參判  
概此校理公之三代也妣海平尹氏公之配平壤趙  
氏普女祔於公墓右麓下有二男景元順元景元二



女李曦具齊賢順元二男瑜瑞女柳喜軒禹承敬趙希尹曾孫敏復瑜出應復震復監察克復生員瑞出也世代雖遠家乘有徵茲憑公七代孫梓之言略敘如右

觀察使李公秦淵墓表

故關西伯李公諱秦淵字靜叔 顯宗己酉四月十八日卒於沮營葬公州榆谷里負坎之原考金吾郎諱德泗妣密陽朴氏同知廷老之女生公於 萬曆乙卯八月初九日資稟絕異人以為神童廿一取進士廿八闈大科隸槐院入翰苑由典籍監察兵郎為

侍從官春坊則說書司書弼善輔德薇垣則正言司諫栢府則持平玉堂則修撰校理應教政府則舍人儲望銓郎而有忌者徑遷司藝間為備局郎守禦從事太僕正又出為茂長唐津公山縣監堂上則水原廣州而廣則自兵郎時已有輿望三南方伯兵刑戶吏曹佐貳承旨大司諫皆其履歷而間或有再踐三踐者蓋公立朝以來殫竭誠心處臺閣則有蹇諤之風登 講筵則多啓沃之益若其居外則聰察絕人剖決如流姦猾斂戢鬚白鼓舞雖古所稱龔黃何以過之真間世之通才也公於西闈陞辭日請密勿通



變 上許以僂宜公至則繕城壁侍糧器陽號蒐狩  
陰習蹈厲又尚文教使皆知方祠乙支文德以振作  
一方凡其施設綽有功緒廟堂交手引重方將以大  
司徒處之意外奄忽不及大奮厥庸豈非邦國之不  
幸也臯復之日軍吏士庶皆奔走號慟官居野處莫  
不驚悼嗟傷 上賜祭錫賄又命一路護喪哀榮備  
矣公事親盡誠居喪盡禮友悌睦婣曲有恩意其他  
事行皆可為後人法公嘗以親老上疏乞歸養 上  
特下溫旨賜衣資食物甚優大夫人下庭祝延而受  
時公位不甚高而蒙被 別典一時榮之韓山之李

以高麗都僉議自成為上祖其後稼亭公穀牧隱公  
穡麟齋公種學連三代大鳴于世麟齋孫蓄觀察使  
生左參贊墳參佐理勳諡安昭安昭生左議政惟清  
於公為五代祖也公既貴推 恩三世曾祖諱洎  
贈執義祖諱濤 贈左承旨金吾公 贈吏曹參判  
夫人文化柳氏觀察使景緝女婦道甚備克持門戶  
生於甲寅歿於丁巳六月初九日與公同塋異室二  
男亨稷正郎萬稷牧使三女適奉事李東耆學生李  
文碩縣監鄭重朝正郎二男秀蕃秀茂二女趙泰崇  
洪皖牧使二男秀輔秀得二女洪晉猷慎必遇側出



二女幼奉事所後子尚震壻柳壽益金日晉鄭元祥  
學生男拱檣參奉慶遠壻金德載尹益齡縣監男秀  
寧復寧壻修撰洪廷弼成啓夏內外曾孫四十六人  
而秀蕃之長子名思徽也尚夏以故人之子嘗拜公  
於牀下竊仰其風猷氣槩今秀蕃氏以牧使命委訪  
窮谷謁墓文甚懇義不敢辭遂略記之抑余聞之公  
先祖麟齋公失其墓一日牧隱公入公夢指其文稿  
所在處公竭誠求之得於嶺表因跋中所記載尋其  
塋域而改修之又公按湖南時適當大旱操文禱海  
將事之久哭聲大震仍大雨滂霈蓋以操卒數千會

滄前洋也至誠所在感通如響理固然矣茲二事皆  
絕異故并記之

知事洪公處大墓表

世稱洪氏多賢公卿近代海峯公以文章行誼顯於  
宣 仁朝有五丈夫子而三人闡大科位宰列福  
祿無與比其一公也諱處大字仲一以 萬曆己酉  
八月廿九日生自幼氣貌峻嶷不妄嬉笑先輩皆以  
遠大期之廿五中司馬兩試卅一策謁聖第四名與  
兄觀察公聯璧由槐院入翰苑陞典籍監察以兵郎  
衣繡湖南自是歷颺華顯於薇垣為正言獻納司諫



於栢府爲執義者再六掌論思爲修撰校理五侍  
胄筵兼說書司書文學輔德天官則佐郎正郎中書  
則檢詳舍人而常帶三字銜中間歷兵郎兼漢學教  
授軍資太僕正及京畿都事錦山縣監而輒還三司  
時伯仲兩公相繼登瀛與仲氏伴直最多一世榮之  
以司成擢拜同副承旨一日上於筵席謂諸臣曰  
自某之離玉堂未見善講者屢遷至左承旨歷戶禮  
兵刑參議判決事間以副价赴燕山出爲安邊府使  
慶州府尹擢陞關西伯臺官有不悅者承當路旨以  
擢昇無端論遞未幾上特除戶曹參判又銜命

使北歷兵刑曹參判都承旨右尹用國葬都監勞  
陞嘉義兼金吾摠府參修顯廟實錄丙辰朝家設  
武科選重臣分掌諸道特陞資憲階帶西樞往嶺南  
枉道感疾至軍威卒于客館是正月廿三日也享年  
六十八訃聞輟朝市致弔祭特命三道護喪用其  
年四月十八日葬于安山治西草芝向西原南陽之  
洪以麗大師悅爲上祖忠平公灌匡定公奎以節義  
勲伐爲世名臣而本朝友菊齋敬孫以詩鳴國家  
之盛圭組代襲世稱甲族高祖諱春卿觀察使贈  
領相會祖諱逸民縣監贈參贊祖諱永弼進士



贈參判海峯公諱命元京畿觀察使 贈贊成妣貞  
敬夫人坡平尹氏僉樞民俊女公之配貞夫人漢陽  
趙氏其考承旨玄洲公纘韓高峯奇先生其外曾祖  
也資性淑哲婦道甚備閨門之內肅雍如也年七十  
二歿於己未十月廿二日祔公墓左舉五男二女受  
容縣監受益縣令受益監役受完早歿受寅郡守女  
適府使李觀周縣令尹普受容一男禹肇進士三女  
適士人李萬長參奉金世重士人李日馨受寬一男  
禹寧文科今為嶺南伯二女適士人郭萬和李世運  
受益一男禹熙受完一男禹基一女適士人鄭顯先

受寅有繼后子禹集李觀周一男德明三女適縣監  
黃夏英掌令具萬理士人趙命德尹普三女適參奉  
韓配漢士人李德秀沈夢賢內外曾玄摠百餘人公  
立心忠實不飾外貌性雖疾惡不言人過罵詈之言  
未嘗及僕隸平居沖穆若無所經意而遇事剖析無  
不該貫立朝三十餘年一心匪懈勤於奉公居臺閣  
則惡訐直之行登 講筵則有啓沃之益歷典州府  
俱有威恩代其任者咸服其能及卒慶人聞公喪如  
哭私親至有服衰者苟非實惠之入人淺者烏能若  
是嘗以玉堂官議進相臣諡號狀中有觸諱語忤



上意與諸臣并被譴謫三月而蒙宥其爲司諫也洪  
宇遠因災應旨有先王寵姬殛死愛子流竄等語  
公以侵上沽直劾之當時論議多右宇遠而咎公  
由是公之進塗常在通塞間然其後宇遠稔兇戕賢  
終以語逼慈聖得罪神人無乃公之明預燭其姦  
慝而然耶呂獻可之先見諸賢猶不能信及知人其  
亦難矣公篤於孝事大夫人盡其怡愉素恬儉自釋  
褐至金貂衣不華美盤無兼味平生不喜交遊雖儕  
流間亦罕過從每早起端坐終日看書尤好程朱文  
常手自抄錄目之曰自警要語置之几上不暫釋手

雅善草隸時或少倦輒戲墨自娛或值花月與一家  
子弟觴詠以自適焉余公之中表親也習知公居家  
澹泊當官謹飭未嘗不欽歎今嶺伯託以墓文義不  
敢辭謹識其槩略如右係之以銘銘曰

才高乎當世而恥皎皎之逞尚以綱者耶位尊乎卿  
月而喜謙謙之德卑以牧者耶唯其源淡者流長盍  
看後承之蕃昌我闡其幽光昭眎乎無疆

大司憲閔公著重墓表

閔氏爲東方文獻大家近世訥齋公三兄弟以德行  
文章事功爲國家柱石士林冠冕嗚呼盛矣哉公諱



著重字公瑞訥齋號也公觀察使諱光勳之長子自  
少文望藹蔚庚寅魁司馬甲辰 親臨庭試又擢為  
第一 上顧問何如人相臣對曰此吏曹參判鼎重  
之兄也仍賀得人 上色喜蓋觀察公與參判公會  
選龍頭公又哀然首多士一時稱以壯元家末第已  
蔭仕至是例授典籍歷騎省憲府玉堂銓郎兼司書  
南學漢學教授常帶三字銜皆極望也廟堂薦授水  
原府使俄擢為嶺南方伯壬子以大司諫還朝禮曹  
參議右副承旨大司成戶曹參判江華畱守大司憲  
備局堂上同知義禁刑曹參判副摠管或再踐三踐

丁巳二月三日卒于正寢享年五十三竊嘗論之公  
羽儀 王庭士望蔚然直筆臺坡風采峻正談經帷  
幄啓沃弘多試之政事外內俱宜真所謂學術之士  
經濟之手而惜乎飛不盡翰壽不稱德使其平生所  
抱負百未一施豈非世道之一大不幸也若其孝友  
之行冰蘖之操家法之嚴整教誨之勤懇世所誦法  
何待余言而可傳也尚夏以故人之子最蒙眷愛周  
旋於禮法之場樽俎之間久矣得與庭下二賢有莫  
逆之契顧瞻今世省識當時之事者宜莫如余以故  
公之諸孫託以墓文何敢辭也第此老病垂死無以



鋪張只依狀文略題數行俾刻于阡表銘曰  
於赫我公瑞世圭璋三賢并武儀表四方嗟今世衰  
士無瞻昂有斐君子終不可忘

判敦寧閔公鎮厚墓表

嗚呼趾齋閔靜能之墓今將樹表孝子纍然來叩徵  
余一言余何忍措筆爲文亦何忍終始牢辭顧此老  
病將死無以鋪張盛美只以平日耳目之所得者略  
題數行蓋嘗論之公之內行篤至家法之嚴正奉先  
之誠慤友愛之隆洽實遵先矩舉世誦法不待余言  
而可傳於後若其愛君憂國可質神明清操苦節

有逾水蘖秉心至正飭躬以禮位至宰樞而自奉如  
布素戚聯肺腑而士林作旃幪此殆古今之所罕有  
者不亦難乎而况繩愆糾謬主不能威奪守法奉  
公人不敢干私籌司布政一皆取裁儀曹掌禮主於  
正俗摠戎則申嚴紀律聽獄則咸服明允恤民之政  
固圉之策晝宵區畫如捄焚溺而精約節省綜理微  
密且其孜孜經學至老不衰雖簿牒叢委而手不釋  
卷疾病沉頓而志不少怠一代之疑文變節靡不叩  
質而使經生學子如飲醇酎國家倚以柱石斯文  
恃以著龜而惜乎百擔枉身不遑自恤終至積勞而



成疾若公真可謂鞠躬盡瘁死而後已者矣捐館之  
日卿大夫哭於朝韋布弔於野以至市井賤流窮谷  
殘氓無不痛傷如親戚何其孚感於人一至此哉公  
之一生用工不出於誠公二字茲蓋司馬光第五倫  
之爲碩儒名卿者而公能由之此所以未施信而人  
信未施哀而人哀者耶嗚呼盛哉公屯村文貞公之  
嫡嗣老峯文忠公之從子同春宋先生之宅相以其  
金玉之相溫粹之姿又能孺染於內外家庭之訓其  
所成就若是卓然孰謂靈芝無種醴泉無源也一時  
諸君子讚述甚盛而世系事實宜載大碑此不著余  
承繼家聲爲期云

海原君健墓表

竊觀近世有處綺紈而寒士操者海原君葵憲公是  
已公諱健字子強我昭敬大王之孫也其考仁城  
君諱珙妣海平郡夫人尹氏左參贊贈領議政諱  
承吉之女公以萬曆甲寅十一月二十七日生八



歲讀小大學十歲謁大內首笄以玉見 世子亦簪  
玉脫以懷之 上大奇之有寵賜 仁穆大妣亦以  
手筆嘉尚焉戊辰仁城公謫珍島不還事在鄭桐溪  
全恩劄公兄弟并配濟州乙亥量移襄陽丙子之難  
郡夫人在京公常西望號慟一日占吉夢未幾郡夫  
人至人以爲孝感時 上在南漢賊圍日急公係念  
宗國題詩巖石曰有夢趨 丹陛無謀解白登以  
寫其忠憤丁丑賜環 上素知仁城之冤下教曰大  
小罪盡行蕩滌而至親獨未蒙恩澤於余心安乎其  
復仁城封爵諸子并除職又 命有司定婚娶錫其

需聞者莫不感動乙未丁內艱長兄有廢疾無子仲  
兄出爲順和君後 孝廟特循郡夫人宿願以公承  
宗事公涕泣固辭不得 命憂吉以海原正襲封爲  
君壬寅冬感疾遂處家事戒諸子以十二月二十四  
日卒于正寢訃聞 顯廟驚悼輟朝市 遣官弔祭  
恩恤有加越明年二月禮葬于楊州塔谷里負壬之  
原從先兆也後用長男恩例 贈嘉德大夫兼都摠  
管公孝性絕倫非公故未嘗離郡夫人側先意承顏  
就養無方疾病親執湯劑不遑寢食沐浴焚香乞命  
于天前後居喪衰麻不離身餐粥不茹果三年如一



日喪餘之日哀慕如袒括時四時上塚未嘗或闕嘗以命慕扁其堂蓋公年近五十故取知天命慕父母之義也御諸子教先於愛處昆季友悌俱至撫諸姪如已出宗戚之窮無依者取而衣食之內兄尹昌門邁孺將死公親自救護竟以得活而公亦無恙人莫不服其義其餘仁愛之及物者皆可書而不盡書常淨掃一室圖書松竹嘯詠自適詩主草堂而書與畫亦皆精妙世稱三絕時與諸宗修禊酒賦歌呼風彩溢發酷愛山水間有佳境或攜壺獨往徜徉忘返所著詩文七卷藏于家公配豐山沈氏處士闡之女豐

山君龜齡之玄孫也在家父母曰孝旣歸姑氏曰賢事君子以敬待宗族以恩儉於服食而致力於祭奠私親之喪竭誠以給葬祭所析田產悉付兄子秋毫無所近季妹年幼鞠養而嫁之自晝哭以後常以未亾人自居囚首垢面至老如一丁卯疾革上遣醫賜御劑慈聖又賚藥物珍羞世皆榮之以六月初六日終臨終無怛化之色其葬與公同塋壺谷南公龍翼誌其墓舉六男一女沈花昌君澆花善君澆花山君觀花春君泚花川君洮花陵君女適郡守沈廷耆花昌二男長茂豐副正根次茂溪守植并無嗣一



女閔彥謙繼子陽平正樞奉公祀花善繼子密昌君  
檝花山三男長卽密昌次洛昌君檠次綾昌君櫛七  
女持平宋宅相趙緬進士南泰承進士權世隆閔德  
煥餘未字花春二男長卽陽平次西平都正撓五女  
成胤長尹師龍崔邦瑞金夢祥尹慶曾花川繼子礪  
城君楫花陵繼子卽綾昌上庶女金慶晉徐宗周郡  
守一男師聖內外曾玄摠八十餘人嗚呼自古貴介  
公子率多有絕特之才而冒於國典進取無望則無  
所用其心沉酣於聲色裘馬之場者滔滔矣唯公乃  
能折節讀書敦行孝義至其餘事文章亦能爲翰墨

家所艷賞斯其爲不朽也無疑矣記昔黃巴之春沈  
郡守宰懷德以公諸胤之懇請墓文于九菴宋文正  
先生先生許之適值耽羅之行未暇泚筆余時在傍  
習知其實今花陵密昌諸公夏託于余余沈夫人之  
戚孫也知公本末頗詳故謹撮其大略俾刻于墓石

贈執義李公榮仁墓表

至性純行雖在千百歲之遠人必聞風而激昂况近  
世之賢乎余方裒輯九菴先生遺集其中有李公榮  
仁傳殆古所謂王玄通之儔乎公龍仁人字時彥父  
諱蓋忠兵曹正郎初娶安氏生男啓仁後娶姜氏以



嘉靖丙寅生公九歲而孤姜氏性嚴且苦心悉其已出唯公一人而少不如意手自敲棒公忘其痛楚輒跪告曰恐損慈氏氣力至於啓仁亦或不免則每涕泣抱持極諫不止及啓仁死公與其孤士慶起敬起孝凡可以周旋調協者無不用極終於得全其家斯豈非處至難而不失其常者歟公出外見一美味輒歸進慈氏慈氏病嘗冀驗吉凶及喪啜粥致毀祭需必手辦不委婢僕少從沙溪先生知爲學之方平居常淨掃一室終日端坐讀聖賢書情容不設於幽獨姊兄趙知事存性見公行事未嘗不致敬焉嘗蔭

補平丘察訪 仁祖改玉平丘人願復得公爲官朝廷許之尋陞司憲府監察丙寅爲眞寶縣監秩滿從民願加一年前後品服及陞敘之 命三降焉及歸民樹石頌德癸酉爲唐津縣監未幾陞安東判官甲戌以清白善治又陞旌善郡守以病遞丙子 上命朝臣各舉可用人薦公者至二十二人明年亂定銓司擬公公州牧使而公已逝矣公每當 國恤必居於外別立素廚以居瘠自丁卯之難以 君父蒙塵常爨食露處及夫南漢被圍之日適在遠鄉未及扈駕日夜北望號泣及聞城下之盟痛哭失聲仍得



奇疾不旬日而溘然是丁丑二月十五日也墓在楊州杏村負西之原從先兆也後以曾孫喬岳貴贈司憲府執義李氏以麗太師吉卷爲上祖世襲軒裳入我朝都觀察使伯持以清白被錄歷二世而有太僕正諱績是公之高祖也曾祖諱宗衡進士祖諱澱皆早世正郎公後贈直提學妣晉州大姓判書顯之女也公有前後二室綾城具氏部將曇女舉一子士益早歿礪山宋氏直長得昌女其子士稷士精奉事士益男後望女適辛宗愼士精女適洪受敘後望二子長卽喬岳擢魁科歷三司方爲黃海道觀察

使次秦岳直長觀察使無嗣以族子世準爲後曰鉉鉉錫辛出也曰禹翊郡守禹鼎牧使洪出也觀察公今將樹表於公墓要余題其後噫公既有此內美世人誦之老先生又列之於傳使後之人觀感而取法焉斯足以不朽於百世奚假余一二談爲公之重耶遂依傳文而略敘世系生卒俾刻于石銘曰行出古人繫天得也旣立其大餘可略也

原溪君元公裕男墓表

粵在宣祖壬辰之亂有舍命立愷天子賜金褒嘉多士建祠俎豆者曰忠壯公豪泊乎仁祖中興



之際又有翊贊大烈扶倫正義蔚然爲一代名相者  
曰原平府院君斗杓元氏之門世以忠義稱之公忠  
壯之子原平之父諱裕男字寬甫以 嘉靖辛酉生  
廿三取武科廿六魁重試歷踐內外內則堂上下宣  
傳官司憲府監察內禁衛將知中樞都摠管捕盜大  
將外則洪州判官端川載寧郡守潭陽昌城密陽府  
使安州牧使上土僉使京畿水使策靖 社勲以正  
憲大夫原溪君 崇禎辛未九月十二日考終于漢  
師第春秋七十一疾斃 上遣太醫視之訃 聞震  
悼輟朝市 賜祭如例 贈右議政以其年十一月

某日禮葬于原州長山先兆下負震之原公氣宇魁  
偉望之知其爲重厚長者事親孝敬備至自先公殉  
節至痛在心如不欲生遇忌日喪食竟其月閉戶涕  
泣或至失聲終身衣素不近華采及丁母夫人憂則  
又廬墓盡制祭奠必以禮有姊孀居奉養于家至老  
如一日推而至於窮族恩意周洽光海時 母后幽  
閉倫彝數塞原平與靖 社諸公密謀義舉以其事  
白公公曰 宗社將亾矣吾家世受 國恩敢愛身  
乎遂流涕而許之及 反正日 仁廟特命公扈衛  
西宮蓋亦親重之也甲子迺變公同尹相昉承 命



畱都亂已得一冊子中有從逆人名姓其麗數千公告尹相卽投之火以安反側識者以爲得宜常以清儉自勵旣貴而寒窶如未達時所居幾於不蔽風雨而亦不以爲意蓋公雖從事弓馬而服襲名父義教居家立朝鮮有媿於古人仕宦至於橫金建節不可謂不顯而視德猶未也故後慶綦綦益大以昌源溪者流長理必然也母夫人尚州金氏承訓郎光厚之女配韓氏上黨大姓其考都事克謏溫雅莊貞事舅姑無違禮奉烝嘗必誠必謹生於嘉靖乙丑歿於崇禎癸未封贈視公爵與公同塋世系子孫具

載忠壯公墓石此不著安東權尚夏述

統虞侯李公德一墓表

昔在宣廟朝湖南有烈丈夫名德一字敬而號漆室文武備具勇略冠一世時稱以李將軍嘗與李忠武舜臣爲知己忠武之建立大功多用公籌策至薦於朝請代已任逮光海政亂築室於登蘿小丘杜門自廢嘗草疏數百言請斬爾瞻等數三元兇以討讎母之罪未及上金墉已閉痛哭如不欲生遂憂憤成疾竟以壬戌不起南中多士至今吃吃誦義謹按其家乘公咸平人上祖光逢高麗密直司事入我



朝有曰孫茂曰好仁以廉孝稱曾祖諱文榦南原教授祖諱依楨中廟朝以孝行學術召為寢郎不就考諱嘗僉知中樞府事妣金海金氏壘簿應乾女文烈公庾信之後嘉靖辛酉僉樞公夢岳武穆至其家遽然覺公已生矣是夜有彩虹之瑞人異之公骨相奇偉聲音弘大性至孝自兒時已行定省之節文才卓絕嘗以為一第可立致會倭奴陸梁大駕西行公不勝慷慨晝則馳馬試劍夜歸讀兵書甲午春赴槐黃喟然歎曰主上蒙塵鳴劍裹革臣子之分也遂應武舉擢乙科丁酉賊大掠湖嶺列郡皆潰公

與鄉人數十百據孤山谷裏賊至一箭倒二人仍來往于樹杪上賊驚曰真飛將也明日移守東幕洞山頂豎白旗書精忠二字賊疑畏莫敢近又移屏風巖賊圍之將上山公使衆人一時下石觸者碎犯者摧公叱曰李將軍在此爾何敢當聲震山岳賊褫魄而退賴以全活者不可勝數公屢上章陳築城備禦之計月沙李相公白於上特陞折衝階三品職庚子為副護軍辛丑僉樞時康津民崔有建等三百人詣闕請納軍糧三百石得公為其守以蘇殘氓夏四月詔使至朝廷以公為延慰使詔使聞公丁酉事



曰東方有一箇男兒嗟惜之由是公名益重癸卯荐  
丁內外艱苦塊體粥一從禮式如有疑節取質於月  
沙公以之無憾戊申 天使熊公化宣 詔聞公姓  
名禮待有加蓋公名已播於中華故也辛亥爲統制  
虞侯主帥李慶濬亦敬遇凡百悉委於公褒揚推遜  
如忠武後有北憂 朝議將築江華城公陳大疏力  
言其不可守公見時事日非作歌二十八章皆傷時  
憂國之辭也後李執義起淳飜以文字以效楚些尤  
菴宋文正先生嘗聞其關山月一闕曰烈烈乎有前  
王不忘之忱聽其歌可以想見其人公嘗騎名騾詣

兵判家兵判欲買之公曰公重臣我武夫今雖價售  
人必疑之兵判遂大悟稱賞觀於此一段足以槩公  
之平生矣公之墓在縣西燕川上麓南向之原公娶  
錦城羅氏其考生員慄有子三人揚弘從仕郎揚徽  
早亾揚休軍器僉正側出男揚烈參靖 社原從勳  
官司果女爲鄭潑鄭沃妻孫爾載有至行載縣誌曾  
孫泰華以學行名不幸短命今其後承方謀樹石于  
公墓五代孫生員世樞千里艱關乞文於余余聞而  
感歎遂略記之如右嗚呼天旣生傑然英特之才似  
若有爲於當世而遭時不淑齋志泉壤若是者儻所



謂命也者非耶昔漢文帝拊髀而歎曰嗟乎吾獨不  
得廉頗李牧為將吾何憂匈奴哉顧今時事多艱安  
得如公者數輩以紓宵旰之憂乎九原難作其亦可  
慨也已

僉正潘公仁後墓表

潘氏系出光州冠冕盛於勝國入我朝有工曹典  
書忠是公之七代祖也其後有諱岡鏡城判官一贈  
戶曹參判有諱瑞麟贈吏曹判書生三子曰碩枏  
刑曹判書曰碩權永春縣監以優老恩陞通政卽  
公之王考也考諱士濂宣教郎妣羅州丁氏贊成壽

崑之孫校理喬之女以嘉靖乙卯生公於陰城之  
馬谷公諱仁後字應先幼有器量操履堅確年十六  
約婚於文川君柳馮家公妹兄金君之岱率公向洛  
公之大人追聞間言馳書中路俾退婚而歸公謂金  
君曰新婦之病不病天也人無信不立失信大不可  
金君善其言以定日行禮新婦果賢且不病大人亦  
喜甚辛卯中司馬又應明經科盡通六書而屈於大  
學公曰窮達有數自是謝公車業專意古人書所編  
輯有百家類語常以居處恭執事敬為六字符每值  
迅雷必卽盥洗整衣冠而坐恬於貨利登科別得與



弟均分壬辰之難 大駕播越公慷慨倡義軍中推  
公爲義兵將屢戰斬獲頗多事聞 行朝錄功除職  
公以書生恥受武功爵讓於本道虞侯後宣武錄券  
成猶以義兵將署公姓名亂已筮仕由參奉例遷主  
簿爲戶曹正郎不拜卒官軍資監僉正戊辰十月十  
七日終于家壽七十四葬于縣南先壠下坐巳之原  
二配祔焉柳氏生二男一女男長雲翼直長次龍翼  
女適進士李紱繼室星州李氏乙巳名人修撰輝之  
孫 宗廟令壽基之女婦德甚備生二男二女男廷  
翼僉樞汝翼有文名屢舉無成女長適士人尹孝寬

次適同知全起宗孫潤漢龍翼出後長房潤世護  
軍潤時能文潤章潤輝早歿廷翼出也曾玄不盡錄  
護軍之孫文字向學之士也與余善一日持丈巖鄭  
公濬之狀謂余曰吾先祖非草草人也第其平日所  
著述及日記之屬皆散失於兵燹履官行事無所考  
據而墓木已拱又無尺表將湮沒無傳此後承之責  
也願得子一言以爲重余不能以不文辭遂就狀文  
略敘如右俾刻于石

監察 贈參判崔公世榮墓表

光海昏亂賊臣爾瞻倡讎母論勢焰熏天時則有若



太學生崔公琢倡多士抗章直斥其兇邪聲名震一時遂杜門田廬與世相忘者十餘年 仁廟改玉擢文科官郡守尤菴宋先生銘其墓亟稱其賢有丈夫子二人公其長也諱世榮字夢與生於 萬曆癸丑復月廿日天資厚重不妄游戲自幼好讀書及長修舉子業有名場屋庚寅中司馬壬辰丁外艱居喪盡禮制終奉母夫人居于墓下爲力田專養計戊戌筮仕爲典牲參奉庚子陞奉事乙巳母夫人下世公年已衰而率禮如前公嘗爲奉事時值慶科做點于泮宮臺官流言以詆訛國子長効遞後國子長秉銓知

其誣首先牽復除 寧陵參奉例遷司瞻奉事 仁宣大妃之喪以 山陵監董勞陞司圃別提出爲三嘉縣監時邑儒權鑑以尊尚儒賢見仇於兇黨方伯欲鍛鍊成獄而公終始守正確然不撓方伯大加愠怒而亦不敢中傷有一勢家子畜邑妓橫甚公大斥不饒其人街之嗾繡衣構誣經年逮獄卒無事實壬戌拜司憲府監察有盡職稱秋除平陵察訪時值荐饑盡心撫摩郵卒蘇馬政舉漁戶徵供一併蠲除積瘼如洗衆皆懷惠秩滿閒居數年氣力康健丙寅五月廿日無疾而逝壽七十四始葬交河網橋里丙戌



移窆于公州治西曲火川負坎之原後以長子貴  
贈嘉善大夫戶曹參判二配俱 贈貞夫人淑人徐  
氏祔焉公性至孝竭力事親左右無違奉先極其誠  
敬與弟世章友愛篤至世章早歿躬莅凡百至鬻已  
田而營葬撫視諸孤如己出推以至於宗族無不得  
其歡心所與交皆當世賢人君子平生無躁暴之言  
峭刻之行酒戶甚寬而居官未嘗近口律已甚嚴而  
撫下以仁去後民追思不忘樹石而誦之蓋其廉節  
是公之長物所至不以一毫自累及歸環堵蕭然而  
處之晏然常以爲譜牒不可不明哀粹氏族之書編

成一部以爲講睦之資全州之崔以高麗侍中阿爲  
上祖入我 朝有曰靈集賢殿提學有曰德之藝文  
館直提學世號煙村先生立祠俎豆高祖諱彥清奉  
事是一蠹之彌甥人稱小一蠹曾祖諱稀壽判官祖  
諱應夏縣監妣平康蔡氏宣教郎忠益之女允齋先  
生撰郡守公墓表備列其賢德淑人貫連山其考  
贈佐郎效積稟性淑哲取與不妄甘旨之供蘋蘩之  
薦一出於至誠宗門式之年八十六歿於乙亥八月  
十日舉三男二女男長邦彥以學術屢登別薦歷幾  
官今爲老職同樞次邦蓋邦顯女適宋彝錫縣監次



許珩邦彥四男守綱守紀守經守約守紀爲邦蓋後  
四女黃鑄李挺英郡守金日井尹壽兼邦顯三男守  
遜守道守迪佐郎二女安希仁尹侃宋壻三男百源  
性源參奉萬源四女李興朝進士李思道金時敘趙  
明濟許壻二男紳縉女未行內外曾玄不盡錄嗚呼  
公以名父之子祇承慈訓行諒兼備文藝夙成宜其  
早揚 王庭大鳴于世而不幸蹉跎棲遲朱墨之間  
惜哉余綴戚屬自幼周旋於牀下景仰有素矣願今  
長老零落已盡知公之詳莫余若也同樞公徵以墓  
文義不敢辭遂撮少日所見聞略序如右

翊贊李公惟彥墓表

公諱惟彥字美哉慶州人上祖新羅開國元勳謁平  
其後有曰攜入我 朝判漢城府事歷一世有諱龜  
禎別提諱鱗萬石諱良國禁府都事是公之高曾祖  
也別提之弟郡守龜瑞龜瑞生司議鯽鯽生奉事大  
邦大邦生僉知暉僉知出後於都事公聘將仕郎崔  
耆壽女以 萬曆辛亥正月十五日生公文才邁倫  
十餘歲便能詩賦乙未筮仕爲童蒙教官學徒甚盛  
後多通顯己亥遷司僕主簿尋以金吾郎出宰狼川  
縣甲辰解歸廣陵之三田浦辛亥爲翊贊丁巳六月



廿九日以疾終葬廣州可樂洞辛向之原公寬厚宏  
淡不事生產以書史自娛環堵蕭然不以爲意築小  
亭於湖上扁以觀魚是都事公舊基傍也都事公昔  
與栗谷思菴相與唱酬於斯亭遺迹尚存公能肯堂  
每與高朋佳友觴詠自適跌宕江湖世念都灰朝論  
嘉之有桂坊之除公雖僉勉應命公退卽出湖上不  
屑屑於宦情所與遊皆當世大人君子如同春九菴  
老峯兄弟最其相厚者也初娶東萊鄭氏主簿慶彰  
女無后再娶固城李氏忠義衛循古女有一女適洪  
箕勛三娶文化柳氏學生時華女舉四男顛願顛預

一女適宋廷采側出男顛女金慶星孫男端弼端佐  
端龍權世衡妻長房出也男端輔女鄭衡周生員申  
憲尹命周妻次房出也男端玄女宋載顯任聖弼妻  
三房出也洪壻男懷女李整宋壻男國賓生員余公  
之戚屬也自少拜公頗款竊仰其有古長者風懿今  
端弼兄弟來乞墓文義不敢辭遂略記如右俾刻于  
石

副護軍宋公國綱墓表

懷德之宋村有篤孝人宋公國綱字伯紀有至性事  
兩尊極其誠敬日必早起盥櫛束帶上堂問起居夕



亦安置而退凡於承歡養志之節無所不用其極年垂七十不懈益虔及喪慤創盡禮無異盛壯人而終亦無恙鄉人咸曰誠孝所感八耄以優老典拜折衝護軍後四歲復進嘉善階同春先生來賀曰此天爵之自至非世人爵名之比也洎其沒也尤菴先生作誄文而祭之盛稱其賢嗚呼若此者豈古所謂一鄉之善士者非耶公恩津人上祖大原高麗判事入我朝有隱德不仕者曰愉號雙清堂雙清之後有曰汝霖楊根郡守 贈通禮曰世勛安岳郡守 贈承旨曰樺壽 贈兵曹參判曰希命同知中樞府事寔

公之四世也母 贈貞夫人晉州柳氏益山郡守之榮女以 萬曆戊子十一月十三日生公端雅溫良家貧好讀書長於文辭屢中鄉解亾何謝公車業日與兄弟親黨怡怡和樂戒飭子孫謹守家法常以勿以善小而不爲勿以惡小而爲之等語揭之座右以警省焉平生未嘗言人過失然於淑慝之辨則甚哲焉一毫不苟得人或勸之仕則曰任分居貞是吾所甘吾將曳裾於何門常淨掃一室嘯詠其間佳辰令節命酒呼朋其樂衍衍 崇禎壬子三月二日以微恙終于家葬公州沙寒里先兆左亥坐之原前配順



天朴氏司果暹之女年廿四以萬曆戊申沒後配  
全州李氏僉知綏智之女生後公一年沒後公七年  
與公同穴而左右附焉李氏婦德咸備同居六十年  
相敬如賓男奎精通德郎朴氏出也奎英通仕郎奎  
會奎報并承仕郎二女適柳興門崔徵遠李氏出也  
奎精三男得弼明弼元弼二女柳東惠吳日章後弼  
暨尹後莘閔仁三池起龍妻庶出也奎英二男蓋弼  
衡弼三女韓益相洪錫夏李聖培奎會無子以衡弼  
爲後奎報女姜漢岐柳男好仁好誠崔男埴二女權  
道益金坯內外曾玄多不盡錄衡弼與余善嘗以公  
墓文見屬今衡弼已亾矣余豈忍負之謹就其家狀  
而隳枯焉使得弼之子來陽鐫于石嗚呼兩先生一  
言之重不啻如九鼎大呂而其存沒之所稱許者如  
許其盛斯足以不朽公矣又何待余言哉



寒水齋先生文集卷之三十一

寒水齋先生文集卷之三十二

墓表

府使宋公時杰墓表

今上乙卯士禍作尤菴先生流離嶺海梅棘六年  
時先生之二弟奔走護侍竭盡其誠洎已巳耽羅則  
禍機益急二公隨行渡海相守不離值園中食乏間  
嘗暫出叔公時燾以病先歸季公時杰猶在海上不  
去從先生至楚山遇後命自初終至掩窆小大親莅  
哀號罔極如不欲生時公年政七十竟無恙人皆異  
之後八年丁丑以復月廿二日考終于家越明年月



正丁酉葬于永同治西某里某原負乾也公字秀甫少孤唯慈訓是受聿循義方晚自奮發大讀孟子書文理遂達然不屑公車業未嘗一赴槐黃壬寅筮仕歷踐內外內則四山監役翊衛司衛率平市署令掌樂院主簿軍資監判官漢城府參軍庶尹外則南平縣監淳昌高陽瑞山郡守茂朱府使其不赴者全義杆城也 仁敬王后之喪爲都監郎費省而功起以其勅歸之地部官吏稱前所未見聞也其在京兆歲久訟案一見辨其曲直上官吐舌南平時邑有儒名而行如吳起者 朝廷方待以遺逸而公聲罪而逐

之蓋嘗病俗吏之違道干譽一以三尺從事雖豪勢不少饒以故請託不行姦強斂戢至於糶糴之出入陰以軍法束之人不能十日了者一日爲之而裕如所至民間風而畏之靡有逋負痛革官吏養戶之弊以蘇殘民之貧不能嫁娶者折俸而資之俾不失時歷典五邑常有去後思金學士萬吉問於先生曰叔季兩丈俱以治郡名畢竟優劣何如先生曰比之科文叔之爲政無可批點亦無可打季則時有可打亦多有貫珠處公生長於法家耳孺目染無非忠孝正直且喜看宋朝名臣錄自警編等書每至賢邪進



退之際輒慷慨扼腕是故遇事侃侃不以利害易其操見人之不善者不曾假色辭人或病其太剛而先生則喜之尹鑄少時有大名其母嘗炙肉欲啖鑄鑄以爲禁物也投之芭籬外公聞之曰此非人情也後必爲大姦慝人不之信至甲寅後咸服其明在官自奉菲薄嘗曰吾祿不及養何忍獨享家食之後力穡自足斥其餘周恤鄉隣值歲荐饑賴活者衆已巳後恨其終鮮馳拜孀姊益復源源姊子憂其疾作移家以相近昕夕怡怡一日就省曰吾死無日敢訣時公尚健未數日奄忽異哉德殷之宋是東方大姓而我

先生以盛德大業爲百世師宗則其閥閱世德人誰有不知者此不著公娶安東權誅女年五十九而卒於丙辰繼配忠原朴惟空女生於丁酉歿於癸亥始窆他山公葬并遷祔焉以兄子基德爲後官察訪生三男四女男圭錫康錫勛錫女適士人李蓄李思齊餘幼星錫井錫心錫軫錫安應耆妻庶出也曾孫男女摠若干嗚呼茲數尺之表豈足以不朽公哉然使今與後之人知我先生之有弟而其行誼之邁倫如此身心之不苟又如此以不疚大賢正家之化則亦可謂吾黨之光豈不休哉



處士閔公光吳墓表

曩賊臣弘瞻倡讎母之論廣收廷議時前金吾郎閔公諱桓獻之曰處變之道當如大舜人莫不驚服後以孝行旌閭 贈左承旨公金吾公之獨子也諱光吳字仲晦初名光兌生於 萬曆戊午五月十六日骨相奇偉金吾公稱之曰吾家千里駒年十一而孤哀毀如成人受學於伯父正郎公枰文詞日進曹伍莫及忽嬰奇疾不就公車人或勸之而終不聽事慈氏安夫人至孝愉色婉容須臾不離側凡所以養志養體者無不用極歲壬寅夫人下世時公年近五十

執禮愈嚴葬前稀粥練後始疏食朝夕哭墓雖寒暑不廢柴瘠幾危而卒幸無事人異之尤慤創於奉祭坐齋必疏淪澡雪凝坐埃曉祭前後三日斷酒肉不茹果至老不變有一姊友愛甚摯祭祀不許隨俗輪行至其析著則厚讓而薄取教子孫必以義方待親戚尤恤孤寡此公制行之篤得於天者然也景仰尤菴先生事以師禮每遇疑晦輒卽稟質經歷禍變起居無替老峯相公公再從姪也其居謫之日頻頻移書寓戒老峯常敬歎焉淨掃庭塢嘯咏自適每遇泉石游賞忘歸平生不作皺眉之事待人以誠不設畦



眇雖僕隸之賤亦皆善遇遠近推服咸稱為長者人  
壬戌邁疾臨歿招訣家族了無怛化之色悠然而逝  
是十一月十一日也壽六十五初葬公州儒城虎洞  
辛卯移窆于局內都事公墓後已向原驪興之閔以  
高麗奉御稱道為上祖自是簪組相承至我朝為  
東方甲乙族若左贊成諱齊仁以文章名世號立巖  
是生諱思容郡守 贈參贊參贊生諱汝儉文府使  
贈判書寔金吾公之考也安夫人籍順興其考  
贈參奉擇善公之配孺人李氏我世宗別子密城  
君瑛之後生員尚炫女性溫和端潔未嘗有疾言遽

色姑氏年老竭誠奉養滫瀡之供麻枲之工無不手  
執使姑氏忘其貧姑氏甚安之每稱其孝敬舉四男  
二女長男德重好學有至行不幸早歿次行重徽重  
得重女適兵使李惠疇士人俞命遵長房二男二女  
鎮綱鎮紘生員俞命集宋姬弼其壻也次房男鎮世  
鎮載進士鎮垓女歸李思榮進士崔益秀曰鎮萬鎮  
坤李弘仁金應參具德潤妻三房出季房一男二女  
皆幼兵使男紳俞壻繼男華重女為進士朴來陽妻  
內外會玄多不盡錄嗚呼公以名家子聰穎邁倫文  
藝夙成宜其早決科第大振厥聲而不幸廢疾家食



以終世皆惜之然以今觀之世運屯艱完人蓋鮮則公之病螫自廢安知非福耶子曰唯孝友于兄弟是亦為政奚其為為政公其庶幾乎哉銘曰  
父煥 哀褒子又克孝唯公卓行有承有教我考其世求古無多石之銘之墟墓光華

承旨成公虎徵墓表

士君子於文質二者不可相無然聖人猶曰從先進其所左右斷可識矣故承旨成公人皆曰賢大夫而以質多文少見稱於諸賢其有得於孔門成法者耶公諱虎徵字炳如昌寧人近世同知敦寧府事 贈

吏曹判書諱雲翰以長德純福為世豔慕五子孝義家法甚美公其長也生於 天啓乙丑二月十三日自幼沉默凝重甫五歲家有回祿之灾公直詣先廟火滅始歸人問其故則曰恐有延燒祠堂之患往而審之聞者驚異及長勤攻經業丙午登文科隸槐院由司錄陞典籍轉禮兵曹佐郎高山察訪咸鏡都事壬子再除持平癸丑陞掌令時 寧陵石儀有罅上罪監董奉審諸臣決遷奉之計嶺人張應一投疏構誣諸臣甚急公首論其乘機傾陷之罪移正言時閔公鼎重以難進獲罪金公萬重李公翮李公選俱



坐言事相繼竄黜公詣臺極論并請還收而其論閔  
公事尤痛切 上震怒斥以阿附鼎重蔑視君父命  
竄極邊大臣政院交章爭不能得遂配于江界即日  
就途怡然自適甲寅蒙宥未幾 顯廟賓天羣臣竊  
柄公杜門謝世間除冗散輒卽辭遞賊鑄子義濟卽  
公從姪壻也鑄因人要見啗以好爵公唾罵之後見  
其女奴之來禁家人俾勿相通問鑄聞而恚之一日  
公弟虎祥以公事造鑄鑄曰聞伯氏諺釋禮說潛獻  
東朝負犯至重須一來見我則可免於罪蓋以  
明聖大妃有愛護士林之德故煽備彙語以爲脅持

威喝計也聞者代怖咸勸一造以紓禍公毅然曰吾  
豈怵於禍而迹權兇之門者吾欲以一疏列其姦狀  
而有父母在不獲自遂耳人皆歎其剛確而鑄亦竟  
不得中傷戊午丁內艱庚申夏化拜正言論賊鑄外  
弟李三達助鑄爲惡及庚戌冬至副使鄭楹雷同逆  
相臣強之誣又屢爲正言掌令辛酉除竹山府使爲  
政清淨嚴恕治爲一道最境內數十面皆立石頌德  
公命仆之遞歸復有遺愛碑癸亥還掌令 明聖大  
妃昇遐差 殯殿都廳甲子拜司諫論許穆罪重不  
宐復官又論洪萬朝李玄祚救護兇穆又與憲府議



停請鞫金煥之啓爲時輩所惠詆移執義用都監勞  
陞通政拜同副承旨自是數年之間八入政院陞至  
左承旨間爲判決事兵刑工曹參議丁卯在政院時  
厲階已成 上怒言事諸臣特下備忘訶責甚嚴公  
與同僚再啓繳還被 嚴教辭遞戊辰出牧驪州州  
有江山樓臺之勝屬春夏之交判書公與姨弟李畏  
齋諸公約會公迎奉晨昏于官軒日稱觴爲歡時公  
年已耆而侍坐唯謹執勞左右雖微細必親之諸公  
爲之感歎起敬判書公既還洛未幾公忽有黔婁驚  
汗之異亟命駕歸覲則判書公示憊已有日矣後數

日卽世人以爲孝誠所感明年己巳 坤聖遜位士  
林邁禍公常痛憤慷慨旣免喪仍杜門自屏不受西  
班常祿雖至屢空不顧也人或言則曰彝倫斃矣  
斯文喪矣此何等時耶誠無心可食祿也甲戌 坤  
位復正姦黨黜退而先輩諸公竄歿無餘用事者又  
是別般人追銜公議停金煥啓乍枳公宿趼士論駭  
之而公則夷然六月始除判決事是冬寢疾十二月  
十一日卒于正寢壽七十翌年二月十五日葬于楊  
州金村負卯之原去判書公墓幾步而近世德具載  
其碣文夫人原州邊氏掌令虎吉之女仁孝和順婦



德甚備判書公常稱法家子生與公同年壬午十二月十五日歿附公墓左有二男二女男必泰必益女適署令柳一運士人安瑞夏側出一男必善必泰二男道顯道敏二女長適進士俞廈基次未行必益二男道行道凝二女長適李彥協次未行外孫柳綱安德裕公脩幹好風儀內嚴毅而外寬裕望之知其爲厚德長者事親至孝與兄弟友愛前後居喪年已不毀而謹守禮制雖病而不近酒醴當暑而不脫衰經祭祀極盡其誠敬愛君憂國終始不懈其在言地抗直不撓屢批逆鱗不少挫沮遇患難而操履愈確當

否運而出處嚴正此雖得於天質而亦豈非修養之力若夫居家莅官篤恩義礪廉白皆人之所難能而在公爲疏節何可盡書余於公年輩差池隱顯殊道未嘗有一日之雅而竊聞其風節久矣今見睡村李公畬文巖鄭公浩論撰其事行益知其所未知蓋二公賢人也其言簡重而稱詡如彼據以爲說可幸無咎略書如右俾刻于墓石銘曰  
姦兇竊弄以啗以喝公視如瓊一言斥絕劫禍移人我佩芳潔滄桑百變晚節采確君子所仰不肖者但大者如斯其餘可略



縣監 贈參判鄭公慶演墓表

近世有松江鄭相公諱澈以忠清剛介爲 宣廟朝名臣公其曾孫也祖諱宗溟江陵大都護府使考諱漫成均生員以清德世其家妣比安朴氏監察峻女公諱慶演字某以 萬曆乙巳十一月十七日生六歲而孤能自奮勵爲學忘寢與食嘗作洞庭魚龍戲詩百餘韻李五峯好閔亟稱之曰奇才奇才叔祖畸菴公亦大加嘉賞弱冠居王父憂制除中司馬薦授英陵參奉未幾換 慶基殿陞司瞻奉事復換典牲署例遷司宰直長軍器主簿移司憲府監察出爲

清安縣監無何賦歸後又歷金吾郎內資主簿爲平陵察訪以親老歸養俄丁內艱服闋踰月而病不起壽六十三公性至孝奉慈闈竭其誠雖厨爨之役不厭躬執其有疾也扶持湯煎不使人代嘗有奇症氣塞移時進指血獲穌延壽十餘年人以為孝感及喪啜粥哀毀日就漸瘁諸子泣諫則曰近俗居喪不如古吾實恥之今病不甚何忍越禮既即吉叔父進善公垂涕謂曰意汝必不全今乃復見汝始知強壯而不自盡禮者皆汝之罪人也平居晨起拜廟祭祀之禮尤致愨謹每遇喪餘淚瀉如血當官以潔已愛民



為本莅政簡平吏胥懼伏其為馬丞 上供簔衣例  
有封餘謂之知味公笑曰簔豈知味之物耶卻之所  
在不以一毫自污上官多敬重焉志操堅貞雅喜恬  
靜前後差除未嘗有自求者雖親友若居要顯迹不  
踵門自守若拙務為韜晦以故終於下位不克有施  
迎日之鄭以高麗平章事均之為上祖入我 朝恭  
簡公洪貞肅公淵皆大顯於世歷三世而至松江公  
公歿後幾年以子貴 贈某官配李氏從 贈貞夫  
人初葬忠州寶蓮山後以災移州北梅沙某年某月  
日又遷于州南某村某坐原二夫人祔焉李夫人貫

德水其考學生稷仁知率禮有孝婦稱三男澍潏泌  
主簿女適縣監洪受灃韓致相閔夫人貫驪興父曰  
光煥五男涉澔大司憲津縣監溫奉事泳女適牧使  
趙泰期澍男瑞河文縣監章河潏男明河昭河緯河  
采河泌男龜河龍河騏河涉男崑河啓河崙河  
澔男羲河舜河津男奎河一幼溫男玄河萬河聖河  
泳無後以舜河為後曾玄不盡錄嗚呼若公志行之  
高何渠不若人而世無知公者公亦不以不知為慍  
全其太素悠然以歿其世於是乎賢矣哉今大憲以  
清修篤學承繼家聲後孫蕃衍如蘭茁芝秀鄭氏之



福蓋未艾也天之所以報施者其在斯歟老峯閔相公狀公行甚悉今以大憲之命撮其槩而記之俾刻于墓石

直長徐公晉履墓表

宣祖大王以第一貞慎翁主下嫁于達城尉徐公景雷有三丈夫子公其季也諱晉履字季昭天啓壬戌二月廿三日生授敦寧奉事癸巳丁內艱服闋拜水庫別檢禁府都事遷尚衣直長辛丑秋以監刈往柴場感疾而歸九月初吉考終于第初葬長湍先塋下其後屢遷終窆于楊根東終面大谷里負甲之原

實戊子也公自幼器度凝重儼然如成人丙子之難公年十五隨兩親避兵江都纔出城忽失公去處舉家驚惶俄而公背負都尉公外祖神版而來都尉公不覺驚喜曰吾家孝子也後以田民賞焉公謙恭儉約絕無芬華習氣事父母盡孝敬之道與諸兄團聚怡愉日以為常析著時伯氏委之諸弟公與仲氏不得已替當之厚讓而薄取以重宗事入美之教子女率有法度前後居憂執喪踰禮竟以此殞歿人皆痛惜大丘之徐以高麗中郎將閑為遠祖曾祖諱嶮篤學早世贈領議政祖諱渚判中樞贈領議政是



為宣仁朝名臣公之配慶州金氏副提學松崖公慶餘之女延平府院君李公貴之外孫也天稟謹愿婦德夙成及歸奉尊章待親戚咸得其道時或隨大主人宮掖莫不嘖嘖稱道當公之歿也適有身而勺飲不入口衰麻不去體淚濕苫藁以至於腐翌年壬寅二月十一日竟阨于產得年四十三舉四男文濟文渙縣監文溥文澤主簿女適士人下東尚側出男文潤武科折衝長房男宗孝縣令宗大宗茂壻安相夔庶女李幸封郡守朴起祖妾也次房男宗秀壻呂廣國生員李廣孝三房男宗植宗極俱歿壻李思

禮庶子宗三宗五季房男宗集進士宗翕宗燮注書宗業進士宗擘宗俊進士宗甲下壻男觀夏生員鼎夏益夏師夏女宋久源李濟泰鄭佐賢李鳴朝嗚呼以公之人地既孝且友以飭其躬空若大顯于世而不幸草草湮沒豈非命也然子姓蕃昌俱有文行天之所以報施者其在斯耶余與公之諸胤善且於松崖第有秦晉之好聞公之行誼甚熟今於墓文之託義不敢辭遂撮其狀叙次如右係之以銘銘曰綺紈之地寒素秉兮樂善於家孝友政兮受豐享嗇嗟哉命兮蘭茁芝秀慶流永兮



進士吳公觀周墓表

壬寅之歲余猥忝司馬榜中最少年公也顏貌秀朗目若明星望之如冰壺玉樹與之言知其才學已邁人數等余固心醉之矣不數年公下世一時儕流咸嗟惜之後五十年公之弟晉周氏以其仲海昌公所撰狀文授余俾記其墓石撫念疇昔何忍以不文辭公諱觀周字大觀吳氏系出海州有諱士謙官典簿以孝聞諱翻觀察使以文章政事顯諱斗寅己巳名臣判書 贈領議政諡忠貞此公之三世也妣驪興閔氏肅敏公諱聖徽女公以 崇禎乙酉六月十四

日生未周歲慈氏見背大母李夫人收育之公自幼能承顏順志事小大必稟於長者其所遊戲不越文墨十歲見隣兒寒凍波咤解衣衣之見者奇之稍長績學攻文聲譽藹蔚壬寅春大饑 朝家禁新恩遊街李夫人欲從衆設聲伎於家公婉辭諭止時忠貞公赴燕歸聞甚嘉歎事繼母金夫人至孝夫人亦視如已出夫人病革公手執湯劑不交睫不解帶半年如一日日夜涕泣衣袖盡腐癸卯四月夫人竟不起疾公執喪過禮不離倚廬不脫衰麻恐有草木之滋菜羹亦不食至病作不變以甲辰六月十八日終年



僅二十葬陽城天德山丙坐原從先兆也後 朝廷  
聞公孝行旌表其門公冲澹寡欲表裏瑩澈容貌辭  
氣自然近道見人取佞若將澆已於一切世間紛華  
泊如也從事於爲己之學孜孜如恐不及取小學心  
經等書晝讀夜思工程有常其中最切於身心者隨  
得劄記常作自省錄及銘賦諸文以寓其志又有課  
簿以記言之得失題其面曰昨日之過不貳於今  
日今日所悔不再於明日然後斯錄也不爲虛文矣  
觀乎此亦可見其真實刻苦非恆人所及也嗚呼以  
公生質之美好學之篤天假之年則其進不可量而

不幸短命未克成就其遠業豈不悲哉然孝者百行  
之源世衰以來未有能盡其性者而公乃奉生喪死  
克遵禮教不以死生易其行至蒙 聖朝之褒典於  
是乎賢矣哉配潘南朴氏承旨世城之女性慈良柔  
惠善事舅姑敬奉祭祀視諸叔妯娌恩意曲至親黨  
無間言與公同年生以癸巳八月廿六日歿附公墓  
左不育取晉周子琬爲后

進士蔡公之沔墓表

咸昌杏峴之負癸原有宰如而宰如者故篤學士蔡  
公之藏也公諱之沔字漢卿生於 崇禎己卯先是



家大人有異夢故小字九萬早孤而好讀書至忘寢食甫弱冠儼然有老成稱登丁巳增廣別試罷榜辛酉中司馬甲子別科占第九名以相臣議只賜一等第餘不與焉乙丑擬掌苑別檢未受點鄉人屢薦學行竟不偶已巳三月朔日以疾終于栗林故宅壽五十一公善事慈親愛敬備至溫清滌滌靡不曲當及喪身不脫衰絰足不入中門三年如一日親病時思嘗牛肉公慮其害疾不卽供以故終身不近口祭祀必誠必慎滌器具饌親自莅之寡姊有疾奉養於家延醫劑藥盡其誠意其歿也斂殯凡百悉自營

辦葬前哭奠悲病則必親人以為難嘗遊二宋先生及百源申公之門得聞為學之方講質疑義極其精研就先世舊址水石佳處築室數間以為藏修之所尤菴先生手書漱菴二字俾揭其楣乙卯禍作尤菴楸棘於蓬山公往省之呈一詩有人多繼祖詆誰嘔文仲血萬古照心事中天有日月之句先生覽訖寫致知存養要語以贈之嘗草大疏極言小人構禍之狀有故不果上逮蔡進士河徵疏救先生遠謫北塞公贈詩以獎其義脫驂以贖其行平居整齊端莊未嘗有疾言遽色於勢利芬華泊如也看書必究理致



甚愛濂洛諸書尤用力於朱子大全手抄其切於立  
心行已者名以約覽於東方最嗜退栗書敬之如神  
明爲文不事瑣琢而自有法度所著遺稿三冊藏于  
家筆勢亦遒勁而未嘗以此自多學徒之請業者剖  
析精微隨分應副必使有成待人以誠實不欺爲主  
兼之以善善長而惡惡短故親疎貴賤無不敬重蔡  
氏貫仁川大司憲襄靖公壽以文章風節蔚爲 成  
中兩朝名臣歷二代而有諱有根 贈左承旨是  
公之會祖也祖諱泓 贈戶曹參判仁陽君考諱夢  
井副司果師事沙溪先生妣善山金氏其考學生厚

生公之配交河盧氏領議政思慎之後副司勇瑗女  
奉烝嘗事夫子教諸孤俱得其宜歿於庚寅五月十  
六日祔公墓下其兆向坤有二男長徵休次徵來早  
歿三女適郭守炳河自崑金弘鼎長房二女次房一  
男幼郭壻二男重厘次幼女金應衡河壻一男瑞龍  
三女幼金壻一男二女并幼嗚呼以公之才學早從  
事於大賢之門其所成就何可量也而數奇壽嗇終  
於陸沉林下是何天道也余與公有同門之契而恨  
未得一雅令於墓表之託有不敢終辭者謹撫狀文  
略敘如右



都事宋公炳遠墓表

余少時見洛中多士屈指諸名勝必以宋子徵爲第一子徵名炳遠同春先生之孫樂靜文孝趙公之宅相受學于允菴先生又從遊於老峯屯村二舅門下所與交皆一代雋望人皆以經濟大業期公不幸沉疾年四十而歿嗚呼其痛惜也哉其考正郎 贈承旨諱光祚以 崇禎後辛卯六月十四日生公顏貌秀朗如清水芙蓉眼彩照人如霽後明星文才瞻敏汪汪不竭筆勢適麗人皆珍愛於天下事莫不經略聽其言如水臨萬仞無有滯礙真一代之俊髦也以

其行懿言之則孝友至行宗門誦之取與 明一芥不苟待人接物曲盡情款若其不義之事不啻如撲湯愛君憂國根於秉彝如聞朝廷闕失必爲之終夕慨然泣涕漣如嗚呼以公之德行才器必能趾美於大賢之門以副一世之所期而草草如此是何天道十八中司馬官察訪別檢都事庚午臘月廿八日終于廣郊辛未三月葬公州鹿洞向禹之原公配璿源李氏掌令 贈贊成迴之女無子以從子堯佐爲後今官縣令女適僉正金濟謙進士李真偉各有子女余嘗師二宋先生夙與公爲莫逆交轉頭之頃墓木



已拱獨畱人世舊迹如夢悲哉悲哉縣令樹表于公墓屬余記之何忍辭也遂略記平日之所聞見俾刻于石

參奉金公始聲墓表

近來鄉學之盛莫如文會書堂堂在公州之活原其師曰陶溪金公公教授之方略如胡先生湖學規模一時生徒多至數百人而成才者亦不少環公州一境家有誦聲里有書室實自公倡之猗其休矣公諱始聲字聞遠蓮城人生於崇禎庚午自兒時已有俊才往往出驚人語長者期以遠到弱冠發解自是

無論大小科被選者十數聲華藹蔚而輒不利於省試衆皆稱屈公則不以得失介懷也有人愍公之有才無命說曰科場不空專靠文字似有他妙歧公不答又有吏人送言曰主我則一第可立取公笑曰丈夫寧坎坷歿身豈忍行險而僥倖乎後幾年科獄作公始悟曰向所云者必此手段也又有人見公文於場中暗謄先呈而高中者公若不知一不開口識者以爲難及公自少聞時菴趙公相禹得沙溪先生之正學摳衣請教時菴期許甚重公亦有所觀感而體行者前後居喪一遵禮制顏色哭泣瞻聆悅服及其



葬日數郡畢至鄉中多士倚以爲重凡係校院大事  
非公莫決志尚高潔足不及貴勢之門如趙相師錫  
少時契密及其秉銓公輒絕之趙相薦公於朝以書  
招徠而公亦不答已巳後趙相失勢來寓全義公卽  
一訪趙相驚喜曰洛下無緣奉袂鄉廬始得逢迎乃  
知無官勝於有官公笑答曰無官之勝止此一事耶  
趙相亦大噱焉癸未道臣登公名于薦牘宗伯閔公  
鎮厚啓請褒錄蒙 允甲申秋除 光陵參奉辭以  
老病不仕丁亥五月有疾廿八日忽命子弟鋪淨席  
遷臥以新衣覆體悠然而逝計聞遠近識與不識無

不齋咨歎嗟九月葬于活原西正安洞丁坐原公氣  
貌莊重制行貞固勢利之談不出於口聲色芬華視  
之若澆姊妹貧不能自活則竭心力而撫恤及其歿  
後取其穉甥育養成立從姪胄五年饑乏食計口分  
濟俾不顛隳推以至於疎遠各得歡心其周窮急難  
之義皆可書而不能盡書也平生不營財產以爲子  
孫計嘗以疏太傅語申申戒曉勸誘後生極其誠心  
雖尋常吟嚙之間未嘗不寓警諸生帖之壁上敬之  
如神明其樂於及人類如此金氏胄于新羅敬順王  
在麗大官相望承繼軒裳入我 朝威靖公定卿以



佐命勲封蓮城君是生漑判中樞平胡公平胡生孟  
鋼承文校勘校勘生玳已卯第壯元神武禍作以大  
成金公門徒被斥仍佯狂自廢寔公五代祖也會祖  
諱守儉僉樞祖諱希賢考諱在鍵行義峻潔世稱雲  
峯妣清州李英暉之女也公之配坡平尹氏其考通  
德郎珩性慈順端潔先公十九年歿葬活原北金蘭  
癸向原生四男一女男長重五無子早歿次定五直  
長次麗五次秀五進士女適士人鄭始友長房一女  
權聖淵直長二女長俞彥燮三房一男命德進士一  
男命集以公命爲直長後鄭壻男東亨東復東績東

緝女尹聖集金應洙許銳進士君以學術趾美見重  
於士友間余亦與之相親習聞其先懿茲於墓文之  
託有不能辭者謹摭其狀略敘如右

贈承旨李公塿墓表

李斯文世瑗甫以先大夫遺命錄其王府君事行泣  
請於余曰先王考有異質其行其才足以需當時其  
名足以傳後世而不幸短命今七十年而尚闕墓文  
此後孫之至痛也願得子一言以爲地下重余受而  
讀之曰嗚呼天旣生若人若將有爲而又從而闕之  
其亦不幸矣夫顧余淺劣雖不敢以立言自居竊傷



其懿行湮沒而無傳又感孝子之至懇遂不能辭謹  
按公諱棟字郊翁碧珍人其考參知 贈判書諱尚  
俊丙子之難主三學士之論名重一時王考諱喜善  
教官 贈贊成會王考諱碩明郡守 贈參判廉操  
世家人比清水妣 贈貞夫人密陽朴氏僉樞冑之  
女僉樞陰崖李文敬公之彌甥也公以 萬曆丁未  
正月廿日生幼而警悟性孝謹有順無違容色愉婉  
為父母所鍾愛長不喜芬靡之習謙恭自牧擇言而  
發厚於戚故與人款曲為儕流所愛慕至於不正之  
事雖小不為見人之為亦不忌憚切判書公嘗典外

邑而公飭志簡潔雖至文房之具亦不欲以浼清政  
凡所謂子弟過者一未嘗有焉其制行有如此者早  
好讀書思慮精專兀兀窮年殆忘寢食苟不卒業雖  
聞聒之言左右至若無聞也其立志有如此者嘗舉  
別試解額未赴殿試而遭貞夫人憂致毀過節輾轉  
沉痾遂至滅性是 崇禎乙亥二月廿四日得年纔  
二十九葬于忠州西黃金谷負亥原從先兆也後以  
孝子從勲 贈左承旨李氏世多聞人羅未有曰息  
言以碧珍太守當麗祖統一以功受將軍號為李氏  
鼻祖至六世祖平靖公約東以清白顯世稱老村先



生仲父忠肅公尚吉以義節殉國而公又以孝終可謂故家風聲有授而有受矣公初娶林川趙氏竹陰公希逸女姿性端明甚得舅姑意先公十三年卒無子葬在揚州佛巖山先塋成坐之兆次娶全義李氏都事考俊女清江公濟臣其祖也莊肅和婉婦德甚盛既稱未以兩兒孤弱恐不克成立義方之教靡不用極雖家事旁落不使知之唯日勉其就師問業外兄東淮申公嘗歎曰李氏妹真女士也以崇禎後丁未卒墓在公墓後有二子長志雄中司馬兩試漢城庶尹次志傑司馬僉知中樞庶尹四男世璜牧

使世球世瓘世璵二女適參奉尹揆尹焜僉樞二男世瑾校理世璣別提五女適柳重榮進士魚史夏鄭萬準府使趙世望柳昌晉世璜男挺相進士世瓘無子取弟子挺樸為後世璵二男挺郁挺樸并進士世瑾三男挺柱進士次幼世璣三男挺楫次幼內外曾玄摠五十餘人噫公雖早世未究厥施後嗣繁昌方將發揚於世福祿蓋未艾也若公者所謂天鍾未發之蓄錫衍於無窮者歟銘曰

清粹者難久氣稟之然耶餘慶方來可必者天耶凡今為善之人盍觀鸞鵠之騰騫



承旨鄭公必東墓表

余少也得御老峯文丈時門下士甚盛而鄭宗之最蒙獎誨至以從姪女妻之余固已目屬之矣後拜柳村公其長子是宗之也觀其事親有法度乃知峯翁之獎誨有以也竊覲其儀表長不滿七尺而神彩映發談論纒纒可聽使人終日不厭出入經史該博洞快於國朝故事人家譜系無不淹貫又知其聰穎明透罕有其倫與之遊從愈久愈款晚聞柳村公病革時斫截左指取血以進遂致指瘡大如股幾殊而幸蘇於是乎始覺前此淺之爲知公也已巳之禍峯

翁柎棘西塞千里往侍不懼火色之炎炎及喪盡事一之義靡有餘憾亦足以警起衰俗邢和叔者流彼何人哉若夫隨世之污隆而進退不苟看人之枉直而趨捨有方處臺閣則抗直敢言在近密則出納唯允其所以尊賢衛道陳善納誨之意惓惓於章奏之間又嘗以春秋大經大法爲當于代理初第一義反覆陳勉此皆同朝之所共知也以故先大王頻置喉司每事諮詢末年眷注非常比公之大略也至於李東彥是公錦山時重駁者而見其非辜將死極力救解請罪讒人此豈人人所易能者哉程子曰恩



讎分明四字非有德者言於此盖見公之所存矣然  
黨論瓜分枝克者衆詆呵溢世吞吐相半可勝歎哉  
語曰不見其山願見其木若公者峯翁視以子弟閔  
靜能聖猷自謂姓不同兄弟農巖金仲和文巖鄭仲  
淳金三淵子益李芝村同甫金尚書達甫李尚書士  
秋皆與公相親許其所羣分不難辨矣異色之吹覓  
於公何損哉仲淳銘其碣靜能誌其壙世系履歷實  
行載之詳矣靜能於人少許可而今觀誌文首以剛  
明廉謹論公此其心悅之言人孰能間焉至若沒誦  
三韻通攷此在公雖曰餘事公未嘗一言於我亦可

見韜晦之一端也又按狀文公嘗論為治之法曰罷  
軍布以除良民之偏苦減大同以均一國之賦規革  
內需司以富版曹改貢物法以省濫費此皆今日所  
宜更張者也何其言之似峯翁也飛不盡翰一未展  
布惜也嗚呼轉頭之頃公之墓草再宿撫念疇昔常  
有九原難作之思公之諸孤乞公之墓文甚懇余何  
忍辭然望九之年沉病將死實不能鋪張大文字只  
以草草數行語以寓悼惜之懷俾刻于表陰重可悲  
也柳村公諱台耆世以長德稱公諱必東宗之字也  
公有三子彥恢彥燮彥煥一榜聯登司馬仲又俱中



其進未涯門戶之昌大可立而竢也

縣監李公賀朝墓表

昔余初見君於華陽門下雙眸燁如神彩秀朗周旋拜揖中度可觀已而先生命次座上韻言下卽對如誦宿作余固已知其才之奇也仍叩其所存蓋嘗受學於其兄同甫氏聞見之博記誦之富儘爲後輩中第一然其中退然常有低人一頭底意思以故人鮮有知之者余益爲之欽歎不已歲庚辰忽聞以疾不起嗚呼若將以有爲而止於此天道不可知也後四年同甫氏以其行錄泣而示余曰今將樹石於其墓

子其文之余辭不獲遂就其錄而按之延安之李起自唐中郎將茂爲東方甲乙族近世有月沙文忠公諱廷龜文章德業大鳴 宣 仁間吏曹判書文靖公諱明漢承繼家學主盟文苑號白洲寔君之曾祖與祖也考諱端相副提學 贈吏曹參判世稱靜觀齋先生休官篤學士林仰之母夫人全義李氏右議政孝貞公行遠之女君名賀朝字樂甫以 崇禎甲辰四月七日生端好聰穎甫數歲已知事親敬長之道稍長文藻日進於經義問難多出人意表作詩亦往往驚人十九中司馬名已大振然猶且不屑於公



車業築室靈芝洞名以三秀日處其中讀聖賢書其於程朱文字用力尤深暇日徜徉山水間吟嘒以自適甲戌夏化 朝廷授翊衛司洗馬遂卽出謝為親屈也歷侍直副率陞主太僕簿以水部郎監富平縣方伯至以清操玉潔惠政春噓稱之其為政可知也死時年僅卅七葬在獨井里負庚之原去靈芝七里而近也娶衛率安東金昌國女舉一男不育臨歿命以從兄海朝子崇臣為後四女長適趙榮祐餘未行君為人愷悌和易人之見之者咸以為可親然於事是非人淑慝言論峻正不以利害撓奪自少寡欲凡

勢利芬華聲色玩好無一嬰其心者事親至孝處同氣甚得其道蓋其識趣之高行義之篤知道者或遜焉詞調清麗本於家庭文亦典雅不失古作者矩度所著遺稿四冊藏于家農巖金公昌協於君為姊兄而義兼師友嘗以文哭之曰端良易直其質美矣孝友慈恕其行仁矣是非別白識見之明也文辭贍暢才華之敏也樂南方且自視歛然若無一能而於人之善則又誠心推服此豈獨今世之所罕雖古人亦以為難也嗚呼唯此數語亦足以不朽君矣仍并錄之俾鑄于墓石



縣監成公虎烈墓表

成氏家法甚正賢孝君子指不勝屈足爲士大夫樣  
子休哉休哉公諱虎烈字風后同知敦寧府事 贈  
吏曹判書諱雲翰之第二子也以 崇禎庚午七月  
六日生自幼知畏敬兄長旣長績學攻文屢舉不中  
甲寅筮仕爲 寧陵參奉序陞別提主簿司評遷司  
憲府監察戊午丁內艱庚申監楊口縣未幾辭遞民  
樹石頌德壬戌由義盈主簿爲衿川縣監乙丑換抱  
川戊辰居外憂旣制闋時當士禍杜門謝世甲戌更  
化出宰果川歲大侵竭誠煦哺隣邑聞風輻輳所濟

活甚衆繡衣閔公鎮厚上其最丙子換報恩因營將  
密關捕送賊魁數人兵使上 聞賞加通政戊寅設  
宴養老六十以上百餘人與焉至夜盡歡人皆鼓舞  
之縣有宿瘼立法變通民到于今受其賜追思碑之  
已卯邁疾就醫洛下以四月望日考終于正寢壽七  
十六月權厝于楊州乙酉四月十四日與淑夫人柳  
氏合葬于仁川新峴午向之原從先兆也公豐貌偉  
幹仁慈謹厚望之知其爲長者人孝誠天得左右就  
養無方判書公性嚴不饒子弟過公必愉婉承奉父  
母安之判書公季年公屢居專城榮養最久前後居



廬守制甚謹不以耆艾少弛友愛篤至接屋而居其樂陶陶兄姊之側不敢敬卧此皆公疏節也平生無慢容鄙語聞人之過幾欲掩耳或以橫逆相加直受不報居官一味寬慈未嘗違道干譽以是雖無赫赫聲而事舉民安廉白自勵不以一毫自累蓋其家風然也昌寧之成以高麗中尹仁輔為上祖為東方大姓世德具載先碣近世諱渙直長 贈承旨諱汝容 贈大司憲是判書公之兩世也妣原州元氏耘谷先生天錫之後寺正振河之女柳夫人貫文化其考司禦時亮事尊章奉君子處妯娌咸得其道撫諸姪

如已出諸姪亦父母之生於已巳卒於乙酉三月九日舉五男一女男必恆先歿以孝 贈戶曹佐郎必復主簿必大必升必濟必升不勝喪以歿女適士人金鎮恆必恆男道元女佐郎李顯章佐郎朴昌厚必復男道東道亨文正字道源必大男道會道集女進士鄭震聖生員金燦李廷璉必升無子子道亨女俞彥鎰必濟男道存女柳鼎明外孫生員聖澤慶澤令澤女申曠會玄多不盡錄嗚呼公之孝友清白實承家傳舊範而公之諸子或以孝行蒙褒 贈或以不勝喪名於世公之德善可謂有自來而有所去矣道



東篤學力行與余頻作文會一日以其大人命乞公墓銘義不敢辭遂就狀文敘次如右繼之以銘銘曰  
為子翼翼宗門式之為官肫肫吏民樂之于以裕後  
停鸞鶴兮石之銘之昭千億兮

任公陞墓表

任司空大仲余之莫逆交也少也因客習於其兄弟  
間甚樂也每與儕流稱晉叔之賢曰此友必遠到他  
日大其家聲者非斯人歟人以為知言不幸短命眾  
皆嗟惜後五十年司空公愍其弟之早歿使其孫選  
來乞墓文悲哉余何忍銘亦何忍不銘謹按公豐川

人諱陞晉叔其字也上世有御史大夫澍顯於麗朝  
代有達官為東方大姓入我朝有曰球參知門下  
府事世德不替繼以文顯高祖諱說弘文提學會祖  
諱榮老重試宗簿正祖諱堯承旨考諱義伯關西伯  
妣金氏觀察使尚之女也以乙酉十二月十六日生  
公幼穎達有氣骨迥異凡兒八歲能離慈闈隨家大  
人于東萊任所宛若成人一府上下莫不歎異大人  
常稱曰此吾家千里駒也及長儀觀秀朗氣韻清峻  
於文辭有雋才為詩好清新語不近唐則輒削彙不  
出戊戌丁內艱丁未丁外艱其侍疾也躬執湯劑不



付他人扶持抑搔甚得親意晝不離側夜不解帶屢  
月如一日傷於苦塊積疾羸瘁以庚戌十月七日不  
起年二十六公早受業於同春宋先生之門而所與  
友皆一時名流識見超邁議論峻整先生長者期許  
甚重配南陽洪氏右議政重普之女婉孌仁孝尊章  
極稱以佳婦公之喪哀毀成疾以壬子正月二日未  
及脫衰而歿公初葬于衿川先壠下洪孺人葬于驪  
州梨湖乾坐之原壬辰四月廿一日遷公墓合窆于  
梨湖有一子士元明雅有才未克有成而歿娶判敦  
寧李正英之女有四男一女男選適逸迴適方爲金

吾郎嗚呼以公之人地才行宜其早颺 王庭大鳴  
于世而草草淪沒名湮滅而不稱是何天道余嘗觀  
士之富有其具而身不顯則其後必昌源淡者流長  
理之常也公之不食之報其將大發於諸孫耶昔公  
之葬也余以一律誅之今見大仲之狀益知其所未  
知遂撫榿槩以記表陰大仲名墜以文章清修爲世  
名臣銘曰  
紛吾內美兮才亦挺霜蕙先秋兮嗟哉命我發幽光  
兮千秋炳

教官姜公錫夏墓表



漢師國門之南有篤學力行安於不求知者自號竹  
隱翁翁姓姜名錫夏字禹卿菁陽君諱大後之第二  
子也少也清癯長者不甚程督而自發憤爲學十六  
盡通經書居常穆然靜坐沉潛爲己之學而俗儒尋  
章摘句之習不屑也菁陽公大嘉之不責以科業規  
模而唯慈闈之期望甚切公懼傷其意始就公車乙  
卯巍捷司馬自是華聞藹蔚操觚之士多讓一頭地  
然數奇不第遂成蹉跎丁亥以公論拜童蒙教官洛  
中子弟望門而趨者日衆時月之間蔚然有成就之  
望是年感疾以三月二十四日終于第壽六十四門

人加麻者六七十人越五月癸丑葬于安山先壠下丑  
坐之原公廣頴脩幹風韻秀朗心無機變之巧口絕  
鄙俚之談孝性出天善事二尊人聲容柔婉愛淡而  
禮至定省溫清之節不如古人者鮮矣嘗於慈夫人  
疾病血指和藥以進夫人欲嘗青梨而不時不得以  
故終身不食梨長於詞賦洩有屈宋家體法詩主少  
陵氣韻清壯文亦渾厚典重澗澗乎有古作者風鳥  
巾鶴氅偃仰一室之中尚友千古意想孤迥時或詩  
花灌圃嘯詠自適最愛此君列植成林仍作竹隱記  
以寓幽情恬於得喪視世之翕翕熱者若將浼焉而



至於語及時事則未嘗不激昂慷慨晉陽之姜為東  
方甲乙族上祖高句麗都元帥以式自是文章德業  
奕世相望屢百年不絕高祖諱克誠弘文應教 贈  
直提學會祖諱先慶都事 贈都承旨祖諱晉昌  
贈戶曹參判菁川君菁陽公官縣監以勲胄襲封號  
妣光山金氏縣監湊之女乙巳名賢典翰虬之曾孫  
公配全義李氏其考都事賊傳也端慤幽靜配君子  
無違禮宗黨稱之生先公四年歿後公一年與公同  
塋有一男啓溥進士為伯氏處士公錫履後以承大  
宗女適士人金泰魯進士子柱龜金壻子致屋嗚呼

天既生此絕特之資空若有為而坎壈不偶齋志而  
歿豈非命耶余與公有葭莩之誼自少服其義今進  
士徵墓文何敢辭也謹取其狀撮其大略係之以辭  
曰  
人不知何傷獨與道俱士安得自高吁嗟乎世途

縣監申公孟慶墓表

丹陽奧區也雲巖之洞山水絕奇余愛之每徜徉於  
其間一日沿溪而下憇于所謂北坪村則有小臺臨  
水植以梅檀儵然若隱者之居諗于里長老咸曰是  
故篤孝人申公之宅也今其孫益謙氏能謹守其家



為一鄉所推許余就叩之儘恂恂長者人也揖余而升斂衽而言曰吾祖性至孝父病疽吮之又嘗十年侍病晝夜不解帶及喪致毀居廬啜粥不食鹽菜三年如一日又於母病嘗糞驗吉凶醫言蝟肉可已之求之不得號泣于野忽有蝟前走持而進之病即愈後又斷指出血和藥得復蘇常與二弟共一室友愛甚摯至其分異也捐其財築屋而居之又擇其入土之良且美者與之事聞朝廷旌其閭其實蹟載三綱續錄蒼石李公峻編邑誌記其事尤詳余作而曰世衰教弛民不興行久矣不意王祥薛包復生於斯

也益謙氏又言曰吾祖制行莊肅見人不善若將浼已有一壻光海時參廢母疏後登第榮歸閉門不見隣有小艾窺觀而慕悅之其母嘗夜密來請使薦枕拒之甚嚴萬曆癸甲之歲餓者盈集計口而哺濟活甚衆中有持瓢二丫鬟泣請終身服役異其言貌使居宅內戒童僕無得相近後求其族而還之果良家也噫吾祖之德善事行必不止此益謙少孤無從可詳其得於鄉里相傳道者僅此數事而已余又歎曰此於公固為疏節而皆足為後人式豈不可泯沒也居數年益謙氏謁碑記于尤菴老先生樹之門



閭又數年謂余曰墓在荒山空谷中不有表後世誰  
知者今將樹數尺之石子其文之余辭謝不敢當既  
而思之余晚出雖未及掃公之門其聞風而激昂者  
淡矣託名於斯與有榮矣遂撮其世系履歷而敘之  
曰公諱孟慶字伯祥號雲溪原州人其先信城府院  
君贊贊生承旨居義居義生察訪致安致安生僉正  
叔倫是公之高祖也曾祖曰希哲生員祖曰應瑞考  
曰介福直長妣曰善山白氏主簿衍女公生於嘉  
靖庚戌二月三日以孝行初授西部參奉為養不就  
再為社稷參奉乃拜 命累官為陽城堤川縣監後

除昌寧則辭不赴年七十二 天啓辛酉六月六日  
卒于家葬郡東栗縣負良之原配尹氏祔焉尹氏父  
健其曾祖碩輔官弘文館直提學舉二男三女男縝  
綽女適某某側出男綸絡統縝之子守謙綽之子好  
謙益謙庶孫尚元綸出昌立昌元昌世絡出孝誠必  
誠統出孝誠登武科為折衝萬戶內外曾玄多不盡  
載云銘曰

閱彼丹山九苞攸翔宰如而宰如者孝子之藏其骨  
雖朽其名則香我銘而詔後千秋萬歲兮無敢毀傷  
處士金君莘望墓表



殷栗海西之奧區也處士金君子衡隱居行義於其中嘗得四禮之學於尤菴先生之門退而教授生徒從學者甚衆如三加六禮等儀文多行於葦門之下觀者豔慕人皆以子衡爲禮家宗匠及喪門人之經而出者百有餘葬有日相與謀曰以吾師之志之行其將湮沒而無傳乎盍碑于墓不朽是圖遂鳩材伐石已其孤弘濟弘弼使其庶弟弘振千里徒步謁文於余而泣且言曰此吾父志也願賜一語以爲地下重余辭不獲已按君諱萃望子衡字也幼學于家庭通孝經小學等書稍長悶家貧親老力穡供甘旨不

匱一日喟然歎曰人而不學無以爲人遂從同縣壘巖李悅受四書三經旣而聞尤菴先生以全體大用之學蔚然爲一代之師表始負笈登門間遊同春函丈之下講質疑義及士禍作跋涉隨往於南北柝棘中受業甚久尤邃於禮書問辨頗多隨書劄記名曰家禮記疑冠婚喪祭一遵朱子法門爲先師心喪三年每值諱辰必焚香望哭臨終口誦師門所教直字之義勉戒諸子悠然而逝士林聞之莫不嗟悼君生質慤實志操堅確教人必以誠信居家孝友兼至嘗慨惋時事疏陳一道之弊言甚切當道臣孟公萬澤



因七邑狀薦其行義於朝而仕進非其意也君光山人府院君國光之後有諱世珍諱廷秀皆通政是君之高曾兩世也祖諱吉秋參奉考諱尚元不仕妣西河任氏萬戶大源之女君配通政金義忠女生三男弘濟弘弼季弘大歿側室二男弘振弘正一女景天錫弘濟男龜齡宇齡雲齡弘弼男萬齡弘大男億齡海齡景壻男命徵君生於崇禎乙酉七月二十八日歿於己亥五月二十五日壽七十五以己亥九月二十二日葬于長連道里巽坐原金孺人始葬松禾栗洞遷而耐焉嗚呼以君之賢有行宜其笙鏞世教

矜式士林而不幸陸沉窮鄉井渫不食悲夫然其遺風餘教遍於一方使後之逖聽相觀者莫不一辭稱善其視世之生極其榮而歿無所稱者得失如何也余自少每與君周旋於先生座下輒歎其忠誠朴實世所罕比及君之二胤久從余遊益聞君平生蓋其篤信好學真切工夫雖古之君子蔑以加矣今狀公者鄭尚書浩而鄭公論人不苟其言益可徵謹就其狀隳括如右俾刻于石

處士柳公澍墓表

光海癸丑賊臣倡讎母之論禍機甚急時布衣柳公



諱澍草疏詣闕鄉人願從者若干人其疏曰臣 殿  
下之國者未必非造訛等也又曰今之三司皆鄭造  
也又曰若不斬此賊倫紀斁絕言甚凜烈觀聽股慄  
皆以爲大禍立至而公則不撓由是杜門斂迹以歿  
其世至今聞其風者莫不嘖嘖歎服焉公字應霖文  
化人高麗大丞車達之後入我 朝領議政曼殊中  
樞原之兩世著聞 國勲中樞之孫自涓以文科殿  
中御史當 端宗時隱海州首陽山以晦其迹其子  
平簡公輕以左贊成錄佐理功臣此公之高祖也會  
祖諱恩宗司直祖諱榮司正考諱重蕃不仕妣清州

李氏公以 弘治戊辰生幼喪二親十七始就學不  
數年巍捷發解人以爲奇才家素富饒村隣之食其  
穀者多以土田爲酬公投券漏室任其朽滅其不還  
給者恐近名也丙子虜難盡室南下已卯五月廿六  
日歿于晉陽公初娶府使趙涑女生一女適生員李  
正國繼娶義昌守淑女生四男一女男軒吉登司馬  
官 厚陵參奉次軒一軒哲軒說女壻李時行長房  
無子壻趙澆次房男禧三房男裸禮壻申決俞重基  
李晟季房男裕爲長房後壻金量內外孫曾摠百餘  
人李孺人天資淑哲無綺紈習教諸子以義方奉祭



祀待賓客禮敬咸備愛前室女如已出年九十三以  
癸丑歿公初葬陽川後與李氏合窆于抱川溪流卯  
向原嗚呼公之所樹立如彼其卓然則其內行之篤  
可知也唯其晚遭明時終亦不偶秉當世權衡者安  
得以辭其責也願今後承兢兢天之報施其在於斯  
歟

處士吳公名立墓表

文義之登臯江上有止善亭故處士吳公之居也亭  
今不在而勝槩依舊好古之士有時尋到而江湖之  
間亦多有能說處士之賢者處士諱名立字顯伯長

於文中庚戌司馬光海政亂遂棄公車業考槃於斯  
日以觴詠自娛每攜鄉里冠童相羊於山光水色之  
間嘗慕宋圭菴鄭北憲之風倡同志立院祠於石川  
之上多士感其至誠推為山長講討詩書士風丕變  
性又嚴峻見人之過必面折之人皆敬憚時公之婦  
弟入於弘瞻之黨翱翔館閣公唾罵而遠之李尚書  
景稷服其清高佩酒相隨輒及日而罷公之弟縣令  
中立以弓馬發身而亦未嘗染迹於權門此亦公正  
家之一端也公以 崇禎癸酉七十一而終始葬縣  
西鷹峯之下後乙丑遷于白谷懷德黃氏耐焉公寶



城人府院君天福之後曰孝寬曰繼夏俱武科曰仲衡不仕曰璟參奉是公之四世外祖士人朴世英公初娶昌寧成天宇女莊敬有淑德生一女適別坐李棧黃氏僉樞俊男女宗黨稱賢婦舉二男長益泰次益升少力學遊於同春尤菴二先生之門先生愛重之二女爲士人閔光國金楷妻益晉益久益觀益恆禹濟李天給南琢妻鄭稷妾側出子女也益泰二男弘國尚國尚國性孝友女河八圖益升三男翰國潤國彥國女柳仲外孫閔任重仁重呂重李尚夏曾玄摠百餘人公脫落塵樊終老林泉視世之不義而富

且貴如視糞土斯已高矣若其尊儒賢廣教思之功尤不可湮沒矣翰國兄弟皆有文行而潤國與余遊久嘗泣謂曰吾先人手撰狀文乞銘於尤菴先生先生許之未幾先人下世仍遭已巳之禍尚今齋恨泉下願子惠一言以慰幽明余悲其言而不忍辭遂爲之銘曰

世丁明夷獨居貞兮矯矯塵表行中清兮宰如斯丘  
闕德馨兮我發幽光詔千齡兮

水使李公璞墓表

湖西之鷄鳳山有宰如而宰如者故節度使李公之



藏也其卒 崇禎後戊午臘月廿三日其葬已未二月廿六日其原負坎其洞都井其縣定山其祔於左者淑夫人丁氏也其孫東公舉與余善余嘗聞公素抱大志齋恨泉壤未嘗不爲之悲嗟今於墓文之託何敢辭也謹按公諱璞字子售禮安人李氏始貫全義至公十世祖寶文提學翊移籍禮安上世有曰禔仕麗官太師子姓繁昌世服大僚爲三韓氏族之望入 本朝有司直成幹自布衣負重望靖國之日乃曰以臣伐君不可事定廷臣擬以重律 中廟教曰不妨崇獎以存伯夷之風也高祖諱埏中司馬兩試

宣陵參奉曾祖諱嗣宗禁火別提因喪去官終老林泉其壻崔簡易豈作記美之祖諱嵩考諱振門僉知中樞府事妣淑夫人坡平尹氏進士覃慶女以萬曆庚戌二月十一日生公公自少負氣不羣磊落英偉始學書通大義中年習弓馬捷丙子別試未幾寇深倉卒未及扈 駕聞林川守李恪倡義遂屬焉虜騎入鴻山恪令軍中曰誰爲擒此賊者公應聲獨出獻馘而辭賞恪壯之上功幕府丁丑選入昭顯侍衛從往潘館以膽勇特受 孝廟知遇錫賚頻繁戊寅東還拜宣傳官兼備局郎自後歷都摠都事經歷



訓鍊僉正副正仍陞本院正兼內乘間爲全羅水軍  
佐幕慶州判官以修舉軍器受旤馬之賞是時 孝  
廟方屬意種蠶寤寐英豪而公輒蒙超敘人以謂藩  
中之遇也已而以其久兼內乘也朶願者伎焉公聞  
卽告遞 上疑其卻步至 教於筵臣自是兩銓連  
擬右遷而經年 靳黈後乃游補邊邑爲慶源寧邊  
漆谷府使吉州牧使洪州營將盡心爲政考績常最  
入爲僉樞羽林將堂上宣傳官用李相國浣薦拜忠  
清全羅兩道水使泰安防禦使戊午冬以疾終于漢  
陽第公天性溫厚樸直平生不設畦畛早失怙事偏

慈竭其誠與人忠居官廉惠於臨民直於事上立朝  
四十年絕無要路迹前後踐歷罔非華膺而率由本  
望不藉推挽力晚年益齟齬罷官家食甌石屢空而  
處之晏如人或勸之立業則曰幸沾寸祿亦足自資  
不義之富非吾志也丁夫人羅州大姓贊成應斗之  
玄孫宣傳官彥球女十七歸于公生質貞淑秉德慈  
順奉尊姑事君子婦道甚備承接姻親下逮妾御曲  
有恩意咸得其實空調恤惠施不問貴賤遠近而恆如  
不及及喪鄰里咸嗟曰仁夫人亾矣生後公二年卒  
先公五年有三男三女男長泰亨生負次泰長武科



通政府使次泰貞武科郡守早率女長適金尚鎰次  
適金聖淵宣傳官次適尹隆濟側室男泰徵天泰觀  
泰夏並武科女壻辛範申玳任溶尹實柳長民生貞  
無子取郡守子爲後卽乞文者也府使子彙郡守子  
集天壻白尚友進士成希齡金泳曰弘鼎弘履暨爲  
尹泰道趙璵李泰興李命載妻者金尚鎰出也曰稹  
稷攢暨爲洪禹錫妻者金聖淵出也爲姜桀妻者尹  
隆濟出也泰觀子槃泰夏子榮辛範子大遠大達任  
溶子定遠宇遠最遠餘幼尹實子尚質萬戶尚文東  
有女未字男觀炳願炳師炳並幼彙有男道炳仁炳

義炳內外孫曾摠六十餘人嗚呼公以魁傑英特之  
資當 聖祖有爲之日受知深厚 睿睿特達若使  
見用於當世者固將爲 王敵愾大有所報效而偶  
失 天意位不稱才豈非命也然公舉學術邁等聲  
名溢世以別薦拜 寢卽不仕 朝廷方擬明揚豈  
天意將以是大公之門耶當拭目而竚之



寒水齋先生文集卷之三十二



